

隨園全集

新齊諧



關神下乩

明季關神下乩壇批某士人終身云官至都堂壽止六十後士人登第官果至中丞國朝定鼎後其人乞降官不加遷而壽已八十矣偶至壇所適關帝復降其人自以爲必有陰德故能延壽臨而請曰弟子官爵驗矣今壽乃過之豈修壽在人雖神明亦有所不知耶關帝大書曰某平生以忠孝待人甲申之變汝自不死與我何與屈指計之崇正殉難時正此公年六十時也

遇太歲煞神禍福各異

徐壇長侍講未遇時赴都會試如廁見大肉塊遍身有眼知爲太歲侍講記某書云鞭太歲者脫禍因取大棍與家丁次第笞擊每擊一處則遍身之眼愈加閃爍是年成進士蔣文肅公家中開井得肉一塊方如桌面刀刺不入火灼不焦蠕蠕而動徐化爲水是年文肅公卒任香谷宗伯未遇時走田埂上遇一人口含一刀兩手持兩刀披髮赤面僵身而過宗伯行未半里見赤面人入喪者之家知是煞神宗伯後登第蘇州唐姓者立孝子坊忽于衣帽中得白紙帖書一煞字如胡桃大是年其家死者七人

歸安魚怪

俗傳張天師不過歸安縣云前朝歸安知縣某到任半年與妻同宿夜半聞撞門聲知縣起視之少頃登牀謂妻曰風掃門耳無他異也其妻認爲己夫仍與同臥而時覺其體有腥氣

疑而未言然自此歸安大治獄訟之事判若神明數年後張天師過歸安知縣不敢迎謁天師曰此縣有妖氣令人召知縣妻問曰爾記某年日月有夜撞門之事乎曰有之曰現在之夫非爾夫也乃黑魚精也爾之前夫已于撞門時爲所食矣妻大駭即求天師報仇天師登壇作法得大黑魚長數丈俯伏壇下天師曰爾罪當斬姑念作令時頗有善政特免汝死乃取大甕囚魚符封其口埋之大堂以土築公案鎮之魚乞哀天師曰待我再過此則釋汝天師自此不復過歸安云

張憶娘

蘇州名妓張憶娘色藝冠時與蔣姓者素交好蔣故巨室花朝月夕與憶娘遊觀音靈巖等山輒並轡而行憶娘素明慧欲託身于蔣而蔣姬媵絕多不甚屬意因與徽州陳通判者有終身之託陳娶過門蔣不得再通大恚百計離間之誣控以姦拐憶娘不得已度爲比丘衣食猶資于陳蔣更使人要而絕之憶娘貧窘自縊而亡居亡何蔣早起進粥忽頭暈氣絕至一官衙二弓丁掖之前旁有人呼曰蔣某汝事須六年後始訊何遽至此呼者之面貌乃蔣平日門下奔走士也曾遣以問憶娘者死三年矣蔣驚醒自此精氣恍惚飲食少進有元妙觀道士張某精法律爲築壇持咒作禳解法三日後道士曰冤魄已到我不審其姓氏試取大鏡潑以明水當有一女子現形召家人視之宛然憶娘也道士曰吾所能力制者妖孽狐狸之類今男女冤讎非吾所能驅除竟拂衣去蔣爲憶娘作七晝夜道場意欲超度之卒不能遣延蘇州名醫葉天士贈以千金藥未至口便見纖纖白手按覆之或無故自潑于地蔣病益增六年而沒蔣氏從孫漪園猶藏憶娘小照戴烏紗髻著天青羅裙眉目秀媚以左手

簪花而笑爲當時楊子鶴筆也

飛星入南斗

蘇松道韓青巖通天文嘗爲予言宰寶山時六月捕蝗至野田中四鼓起坐胡床督率書役見客星飛入南斗私記占驗書見此災者一月之內當暴亡法宜剪髮寸許東西禹步三匝便可移禍他人爾時我即磨去書役依法行之居亡何署中司書記者李某無故以小刀剖腹而死我竟無恙李乃我薦卷門生年少能文不料爲我替災心爲悵然余戲謂韓曰公言占驗之術固神矣然如我輩全不知天文往往夜坐見飛星來往甚多倘有入南斗者竟不知厭勝法爲之奈何曰君輩不知天文者雖見飛星入南斗亦無害余曰然則公又何苦知天文多此一事而自禍禍人耶韓大笑不能答

楊妃見夢

康熙間蘇州汪山樵先生諱俊選陝西興平縣宿馬嵬驛中夢一女子容貌絕世明璫翠羽投牒而言曰妾有墓地爲人所侵幸明府哀而察之汪驚醒詢土人曰此間惟有楊娘娘墓道唐時改葬後基址原有數十畝寬自宋明以來爲樵牧所侵漸無餘地汪爲清理果有舊碑記存墓側土中題大唐貴妃楊氏墓乃爲別置界石兼買樹百株植其上春秋設二祭焉

曹能始記前生

明季曹能始先生登進士後過僊霞嶺山光水色恍如前世所遊暮宿旅店聞隣家有婦哭甚哀問之曰爲其亡夫作三十周年耳詢其死年月日即先生之生年月日也遂入其家歷舉某屋某徑毫髮不爽其家環驚共來審視曹亦淒然涕下曰某書屋內有南向竹樹數十

株我尙有文稿未終篇者未知猶存否其家曰自主人捐館後恐夫人見書室而神傷故至今猶關鎖也曹命開之則塵凝數寸遺稿亂書宛然具在惟前妻已白髮盈頭不可復認矣曹以家財分半與之俾終餘年余按文苑英華白敏中書滑州太守崔彥武事崔記前生爲杜明福妻騎馬直抵杜家而明福老矣乃說舊事取所藏金釵于垣中施宅爲寺號明福寺與此相類

江南客寓

滌齋先生爲諸生時在京師賈家衞衞有店號江南客寓廳屋三間中一間甚潔住者絕少先生居之了無他異一日外出託所親某管其衣物夜睡至三鼓忽室內盡明時並無燈燭所親駭揭帳視之見一長人黑色手提其頭血淋漓對面直立不動呼曰爾何得居此所親狂奔出告店主主人曰此屋素不安靜爾乃必欲居之奈何次日先生歸告之故先生曰此必有鬼欲申冤耳我在此何不現形耶大書一狀向空焚之以爲爾果有冤當于今晚赴訴是夕先生復睡未一更所見果如所說但持一血頭跪而不立先生問何人何冤持頭者以手指口竟無一語次日亦不復見先生又常于園中月下見黑物一團大如浴盆追奔樹下以腳踢之隨腳而滅次日視其靴襪黑如烟煤并足皆黑

荆波宛在

本朝佟國相巡撫甘肅按站行至伏羌縣夢神呼云速走走佟不以爲意次晚夢如初且云欲報我恩但記荆波宛在可耳佟驚起亟走三日而伏羌縣沉爲湖卒不解救者爲何神後出巡至建昌野渡有關公廟上書荆波宛在四字佟入拜謁大爲修葺今煥然猶存

馮侍御

馮侍御靜山居京師永光寺西街改造書屋掘地得黑漆棺爲改遷之夜夢人投牒訴冤馮時巡西城夢中取牒閱之告勢宦掘棺事即己之姓名也驚醒得疾疾革時夫人聞房中笑語聲以爲病有起色往視之見黑衣人素不相識者坐床上一閃而滅侍御謂夫人曰此人吾鄰也曾作運糧守備運餉至京師卒棺厝于永光寺前街僧寺中迫近吾家而吾不知今聞我亦有行期故來相約耳可燒紙錢助其冥資夫人遣人至前街蹤跡棺識宛然知先生之終不起也

藥師父

崑山徐大司寇之子徐冠卿幼時號藥師父以其曾醜死一業師也業師周姓號雲核受司寇聘前一日夢巨蟒以口吐紅丸逼令嚥之腸痛而醒就聘于徐督冠卿嚴冠卿素佻達笞責尤甚冠卿與僕謀置醜于飯食之而卒後冠卿爲翰林不得志詩文多怨誹爲人所搆就鞠刑部見左司楊景震大驚曰吾死矣吾初見時儼然周先生也次日復訊各官俱以司寇之子稍加憐恤楊獨怒鞠批其頰數十下齒左右墜定以斬決獄上即刑楊爲監斬官其家訪之楊景震之生年月日卽周先生之死年月日也或告之楊楊大笑曰豈有是哉使吾早知此語轉當屈法以救之矣此與太平廣記載王武俊事同

莊秀才

通州莊孝廉成戊午舉人少年貌美其佃戶有女悅之竟以成疾臨卒謂其父曰吾爲莊秀才死也吾思嫁莊秀才自念門戶寒賤事必不成故鬱鬱成病今雖死此意當爲致之秀才

則目瞑矣其父急告莊莊往視而氣已絕莊赴秋闈遇女子于淮新橋宛然如生入闈一切炊飯烹茶之事見女子身爲執役是年登第每有遠行則女子必至莊怖之爲置神主祭于家書亡妾某氏見女子來拜謝自此絕矣

藹藹幽人

通州李臬司諱玉鉉丙戌進士少時好煉筆錄忽一日筆于空中書曰敬我我助汝功名李再拜祀以牲牢嗣後文社之事題下則聽筆之所爲尤能作擘窠大字求者輒與李敬奉甚至家事外事咨之而行靡不如意社中能文者每讀李作嘆其筆意大類錢吉士錢吉士者前朝翰林錢熹也李私問筆神答曰是也自後里中人來扶乩者多以錢先生呼之筆神遇題跋落款不書姓名但書藹藹幽人四字李舉孝廉成進士筆神之力居多後官臬司神助之決獄郡中以爲神李公乞歸神與俱李他出其子弟事神不敬神怒投書作別而去余與李公之子方膺同官交好絕不向余道隻字方膺卒後臬司同年熊滌齋太史爲余言之并云方膺深諱其事蓋忤神者即方膺也

僵屍求食

武林錢塘門內有更樓雇更夫擊柝表裏巡邏大衆斂貲爲之由來舊矣康熙五十六年夏更夫任三者巡巷外路過小廟每至二更聞柝聲則有一人從廟中出踉蹌捷走漏五下則先柝聲入廟如是者屢矣任三疑廟中僧有邪約將伺之爲詐酒肉計次夕月明如晝見其人面枯黑如腊目眶深陷兩肩掛銀錠而行窸窣有聲出入如前任三知爲僵屍因山門之內停有舊櫬積塵寸許詢諸僧人云其師祖時不知誰何氏所寄厝者也與儕輩語及之其

中黠者曰吾聞鬼畏赤豆鐵屑及米子備此三物升許伺其破棺出潛取以繞棺之四周則彼不能入矣如其言購買三物待夜二更屍復出伺其去遠攜燈入視見棺後方板一塊俗語所謂和頭者已掀在地中空空無所有乃取三物繞棺而密洒之事畢徑歸臥更樓上至五更有厲聲呼任三爺者任問爲誰曰我山門內之長眠者無子孫久不得血食故出外營求以救腹餒今爲爾所魘不能入棺吾其死矣可急起將赤豆鐵屑拂去之任懼不敢答又呼曰我與爾何仇何苦爲此虐耶任念與彼解圍之後彼殺我而後入何以禦之終不答雞初鳴鬼哀懇繼以詈罵久之寂然明日過樓下者見有屍僵臥乃告衆鳴官以屍還諸棺而火焚之一方得甯

僵屍貪財受累

紹興王生某食餼有年村中富家延之爲師因屋宇湫隘適相距里許有新室求售者遂買使居且曰家中拊擋未盡學徒暨館童輩明晨進館先生一夜獨眠能無懼乎王自負胆壯且新室也何畏之有乃命童攜茗具引至書齋王周視室內畢復至門前徙倚時已夜矣月色大明見山下燭火熒熒趨往視之光出一白木棺中王念此鬼燐耶色宜碧而醖帶微赤得無爲金銀氣乎憶智囊所載有胡人數輩凶服輿輓而藁葬城外者捕人跡之輓中皆黃白也此棺毋乃類是幸無人可攫而取也遂取石塊擊去其釘從棺後推卸其蓋則赫然一屍面青紫而腹膨亨麻冠草履越俗凡父母在堂而子先亡者例以此殮王愕然退縮每一縮則屍一躍再縮而屍蹶然起王盡力狂奔屍自後追之王入戶登樓閉門下鍵喘息甫定疑屍已去開窗視之窗啟而屍昂首大喜從外躍入連扣門不得入忽大聲悲呼三呼而諸

門洞開若有啟之者遂登樓王無奈何持木棍待之屍甫上即擊以棍中其肩所挂銀錠散落于地屍俯而拾取王趁其僂僂時儘力推之屍滾樓下旋聞雞啼從此寂無聲響矣明日視之屍跌傷腿骨橫臥于地遂召衆人扛而焚之王嘆曰我以貪故招屍上樓屍以貪財被人燒毀鬼尙不可貪而況于人乎

宋荔裳受惡土地之累

宋荔裳爲山東臬使族子某素不肖與總兵于七飲博爲姦于七者前明末年山東土寇降本朝者也雖爲總戎怙惡不悛人以族子事告公公怒曰如此必爲家門之禍俟其歸將縛至祠堂杖殺之某聞之逃至德州夜宿土地廟中夢土地神謂曰汝母怖大富貴至矣現在于七謀反汝可速往京師赴提督處出首且曰某地中埋有百金可取爲路費族子掘地果得金大喜以怨其叔故遂赴提督處並誣其叔與于七通謀以故荔裳被逮入獄未十日于七果反族子以首報之功受賞荔裳牽累入獄旋亦超雪

陸夫人

某方伯夫人陸氏尙書裘文達公之乾女也文達公薨後夫人病夢有大轎在屋瓦上行來前立青衣者呼曰裘大人命來相請夫人登轎冉冉在雲中行至一大廟正殿巍峨旁有小屋甚潔文達公科頭衣繭紬袍二童侍几上卷案甚多謂夫人曰知汝病之所由來耶此前生孽也夫人蹠而請曰乾爺有力能爲女兒解免否文達公曰此處西廂房有一婦人現臥床上汝往扶之能扶起則病可治否則我亦不能救汝命小童引夫人往西廂房果有描金床施大紅綾帳被褥甚華中臥赤身女屍兩目瞪視無一言夫人扶之手力盡矣卒不起歸

告文達公公曰汝孽難消可還家託張天師打醮以解禳之但天師近日心粗祿亦將盡某月日替蘇州顧懋德家作齋文錯字甚多上帝頗怒奈何夫人驚醒適天師在京遂以此言告之天師檢顧家齋表稿中果有誤字法官所寫也心爲驚悸未幾夫人亡天師亦亡天師名存義顧懋德者辛未進士官禮部郎中

牛頭大王

溧陽村民莊光裕夢一怪頭上生角敲門而進謂曰我牛頭大王也上帝命血食此方汝塑像祀我必有福應莊醒告知村農村方病疫皆曰甯可信其有糾錢數十千起三間草屋塑牛頭而人身者坐焉嗣後疫病盡痊求子者頗效香火大盛如是數年村民周蠻子兒出痘到廟先具牲牢祀神再擲卦大吉周喜許演戲爲謝未數日兒竟死周怒曰我靠兒子耕田養我兒死不如我死率其妻持鋤鋸撞牛頭碎其身毀其廟合村大驚以爲必有奇禍自此寂然牛頭神亦不知何往

水定菴牡丹

江甯二尹汪公易堂訪友古北口路憩水定菴菴中牡丹盛開花大如斗汪近前賞玩菴僧戒勿折花花有妖能爲禍汪素剛笑曰我本不折花旣云有妖當折而試之以手摘之花左右旋轉堅如牛筋竟不能斷取所佩刀截之花未斷而拇指傷血涔涔下汪慚且怒以袍袖裹血忍痛不言乃左手摔花頭而右手以刀截其根竟斷一枝歸畜瓶中夸于人曰我今日獲花妖矣將購藥醫手創細視之並無刀痕袍袖上亦無血迹

烏臺

粵東肇慶府即古端州包孝肅舊治也大堂暖閣後有黑井覆以鐵板爲出入所必經相傳包公納妖于井俗有包收盧放馬成湖之謠謂太守遇盧姓則妖出遇馬姓則井溢也然千百年來亦從無此二姓爲守者署東有高樓號稱烏臺俗謂包公聽斷妖鬼皆坐此臺四面磚石封固啟則爲崇凡太守履任必祀以少牢無敢啟視者前任安守有管廚人某酒醉登樓巔揭瓦窺之見臺中有三土堆品字排列如小墳狀中間小樹一株枝青葉綠此外一無他物方瞪視間有黑氣衝起廚人自樓巔滾跌于地顛汗交作僅能言所見至夕狂叫而死越日安公暴染瘋狂鞭撲其妻竟至身死又手刃其愛妾以此落職獲譴越兩任後家弟香亭出守是郡家信來爲言若此余聞而大怒寄信云此說荒唐可也若真有其事則樓神不法甚矣斷非包公舊迹弟何不拆而焚之

見娘堡

順治乙酉 王師破建昌明益王遁去長史劉某吳下人也逃山中不知所往其子蓼蕭從吳門赴考歸有志尋親時藩府荒圯莫可蹤跡乃禱于甬江張令公祠夢神書石澗二字與之醒而徬徨不知何地遇一尼告曰石澗在閩廣之交阻兵難行幸有曲徑七日可達如其言歷盡危險竟至其地父母依村農姚氏居焉母子相持而泣父已死矣乃持喪奉母而歸所居村名見娘堡名已奇矣尤奇者長史避難時攜家譜一冊自隨戊子歲其母聞窸窣聲出自篋中以爲鼠也啟視無有閉則復然一日見緋衣人數輩冉冉從篋中走出益大驚逾時而孝子至此事載姜西溟文集中韓尙書莢爲之表墓

鬼糊塗

乾隆三十九年京師有無賴子韓六毆傷其父刑部審明下獄擬斬侍郎某以所毆非致命處意欲減等發落大司寇秦公奏名分所關理宜正法奉旨依議遣刑部司獄司李懷中監斬後三日鬼附李身口稱諸大人業已寬我而汝來斬我我死不甘故來索命聞者駭然以爲此鬼糊塗然而李竟不起

鬼勢利

張八郎有所懼婢婚後棄之婢幽怨成疾臨死曰我不饒八郎語畢氣絕忽又張目曰八郎運甚旺不能報仇我捉八奶奶也是一樣未二年八郎夫人竟以產亡

鬼相思

岳州張某號鬼三爺以其行三爲鬼所生故也父某府學廩生妻陳氏有色忽憑妖自稱隕陽小神白晝現形與之交接張雖同牀無故自離若有梏其手足者其家遍請符籙毫無效驗三月後陳氏受胎生子空中羣鬼啾啾爭來作賀擲下紙錢無數張忿甚將到龍虎山求救于天師忽一日小神踉蹌來汗如雨下語其妻曰吾幾闖禍昨夜入汝隣毛家偷其金盆被他家所挂鍾馗拔劍相逐我懼爲所傷不得已急走將金盆擲在巷西池塘中脫逃來此汝速具酒替我壓驚次日妻告張張往毛府刺探果失金盆合家喧吵將控官捉賊張止之曰我有法替汝取來作何謝我毛氏大喜曰果得金盆憑君取索張詭作念咒狀良久喚毛氏家人徑往塘所命善泅者入水取之果得金盆毛延張上座問以何物作謝張笑曰我讀書人不受財帛只須君家收藏書畫與我一二件足矣其家盡出所藏張選取文徵明芙蓉一幅其家覺謝禮太薄心抱不安張乃指壁上所挂鍾馗像曰賜此畫湊成兩件何如毛氏

唯唯張取歸懸空中小神從此永不再來但聞園中樹上鬼哀哭三日人稱鬼相思云

關神世法

康熙癸卯舉人江闈選某縣令丁憂歸將起復時夢有甲士來自稱周倉服飾如今廟中所塑而少年無鬚手持名帖上寫治年家弟關某頓首拜驚醒大笑以爲關帝行此世法未幾選山西解梁知縣往謁武廟旁塑周倉果少年無鬚者也面貌恍如夢中乃捐俸重修神廟後竟卒於任所江公卽于九太守之叔太守爲余言

鄉試彌封

皖江程叔才名思恭學問博雅註陳檢討四六得名以平時好古不喜時文其師唐赤子太史責之曰科名進身非此不可今歲入場之年汝宜留意因強之誦讀金陳諸大家文程唯唯終非所好四書體註等書臨場並不翻閱康熙戊戌科江南首題舉賢才曰焉知賢才而舉之次題大哉聖人之道程三場畢自言首篇頗得意唐太史讀之喜曰頗可望魁程急取案頭中庸一看愕然喪氣喟曰不中用了我只道大哉聖人之道在禮儀三百威儀三千之下故領題出題俱承接此二句今方知是開首第一句則通身犯下矣其不中尙復何言唐亦爲之悼嘆已而榜發竟中第五名唐不解所以得售之故往見主試將探問之主試某故唐公同年一見笑曰今年科場中有笑話兄知否唐問故曰 皇上有密旨謂諸生關節都放在破承領題出題三處今歲將此三處盡行彌封故有程某文字領題出題全行犯下竟中五魁將來磨勘定受參罰奈何唐笑而不言後叔才先生果被吏部磨勘罰停一科

兩汪士鉉

順治間徽州汪日衡先生元旦夢行天榜會元汪士鏊先生乃改名應之竟終身不第直至康熙某科汪退谷先生中會元榜名士鏊相隔四十餘年日衡先生死久矣孫某記乃祖之言相與嘆造化弄人亦覺無謂

雷擊土地

康熙間石埭令汪以炘素與其友林某交好後林死爲石埭土地神每夜間陰陽雖隔而兩人來往如平生歡土地私謂汪曰君家有難我不敢不告第告君後恐我難逃天譴汪再三問曰尊堂太夫人分當雷擊汪大驚號泣求救土地曰此是前生惡劫我官卑職小如何能救汪泣請不已神曰只有一法可救汝速盡孝養之道凡太夫人平日一飲一饌一帳一衣務使十倍其數浪費而暴殄之庶幾祿盡則亡可以善終雷雖來無益也汪如其言其母果不數年而卒又三年天雨雷果至繞棺照耀滿房硫磺氣卒不下破屋而出飛擊土地廟塑像成泥

張光熊

直隸張光熊幼而聰俊年十八居西樓讀書家豪富多婢妾而父母範之甚嚴七月七日感牛郎織女事望星而坐妄想此夕可有家婢來窺讀書者否心乍動見簾外一美女側身立喚之不應少頃冉冉至前視之非家中婢也問何姓曰姓王問居何處曰君之西隣晨夕見郎出入愛郎姿貌故來相就張喜卽與同榻此後每夕必至有家僮伴宿女謂張曰小奴不宜在此可麾令遠宿聽喚再至張遣奴奴不肯曰每夜聞郎君枕蓆間妮妮軟語疑有別故老主人命奴調護郎君不敢遠離張無奈何以其言告女女曰無庸將自困是夕奴未睡熟

被一物攫去繩縛之挂西園樹上奴哀號求郎主救命女笑曰伊果知罪遠避即赦之如敢漏洩被老主人知者將倍令受苦奴唯唯即時繩解奴已在地矣居年餘張漸羸瘦其父問奴奴稱郎處無他故而意色漸沮父愈疑自至張齋前伺察聞帳中有婦女聲踢窗直入揭帳無人惟枕角有金簪一枝山查花一朵父念北地從無山查花此必妖魅所致怒將笞張張不得已以實告父爲迎名僧法官設壇禁咒女夜間來哭謂張曰天機已洩請從此辭張亦哀慟臨別問曰尙有相會期乎曰二十年後華州相見從此遂絕張隨娶陳氏登進士第授吳江知縣推陞華州知州而陳氏卒其父在家爲續娶王某之女送至華州官署成婚却扇之夕新人容貌宛如書齋伴宿之人問其年剛二十歲或曰此狐仙感情欲而託生也語從前事恰不記憶

趙氏再婚成怨偶

雍正間布政司鄭禪寶妻趙氏有容德與鄭恩好甚隆以瘵疾亡臨訣誓曰願生生世世爲夫婦卒之日旗下劉某家生一女生而能言曰我鄭家妻也劉父母大驚以爲怪嗣後遂不復語八歲過親戚家路遇鄭家奴騎馬衝其車怒曰汝鄭四也自幼賣身我家何敢見我不下馬鄭奴愕然因訪至劉家見女父母具道生時之異女歸見鄭四因問汝主安否并詢一切始媪上下奴婢田宅事歷歷如繪有奴所不知而女悉知者奴歸白之鄭鄭亦至劉家女諦視涕泣絮語良久時鄂西林相公以爲兩世婚姻亦太平瑞事勸鄭續娶劉女十四歲即行合巹之禮時鄭年六旬白髮飄蕭兼有繼室女嫁年餘鬱鬱不樂竟縊死袁子曰情極而緣生緣滿而情又絕異哉

童其瀾

紹興童其瀾乾隆元年進士官戶部員外一日值宿衙門與同官數人夜飲忽仰天咤曰天使到矣披朝衣再拜俯伏同官問何天使童笑曰人無二天何問之有天有勅書一卷如中書閣誥封雲中金甲人捧頭上而來命我作東便門外花兒闌河神將與諸公別矣言畢泣下同官以爲得狂易之疾不甚介意次早大司農海望到戶部童具冠帶長揖辭官具白所以海曰君讀書君子辦事明敏如有病不妨乞假何必以神怪惑人童亦不辨駕車歸家不飲不食將家事料理三日端坐而逝東便門外居民聞連夜呼騶聲以爲有貴官過就視無有花兒闌河神廟中道士葉某夢新河神到任白晳微鬚長不逾中人果童公貌也

鏡山寺僧

錢塘王孝廉鼎實余戊午同年少聰穎年十六舉于鄉三試春官不第有至戚官都下留之邸中偶感微疾即屏去飲食日啜涼水數杯語其戚曰予前世鏡山寺僧某也修持數十年幾成大道惟平生見少年登科者輒心豔之又華富之慕未能盡絕以此尙須兩世墮落今其一世也不數日當託生華富家即順治門外姚姓是也君之留我不出都想亦是定數耶其戚勸慰之王曰去來有定難以久留惟父母生我之恩不能遽割乃索紙作別父書大略云兒不幸客死數千里外又年壽短促遺少妻弱息爲堂上累然兒非父母眞子有弟某乃父母之眞子也吾父曾憶某年在茶肆與鏡山寺某僧飲茶事耶兒即僧也時與父談甚洽心念父忠誠謹厚何造物者乃不與之後耶一念之動遂來爲兒兒婦亦是幼年時小有善緣鏡花水月都是幻聚何能久處父幸勿以眞兒視兒速斷愛牽庶免兒之罪戾其戚問生

姚家當以何日王曰予此生無罪過此滅則彼生不須輪迴越三日已刻索水盥漱畢跌坐胡床召其戚歡笑如平時問曰午未曰正午曰是其時也拱手作別而逝其戚訪之姚家果于是日生一子家業驟馬行有數萬金

江秀才奇話

婺源江秀才號慎修名永能製奇器取猪尿胞置黃豆以氣吹滿而縛其口豆浮正中益信地如雞子黃之說有願爲弟子者便令先對此胞坐視七日不厭不倦方可教也家中耕田悉用木牛行城外騎一木驢不食不鳴人以爲妖笑曰此武侯成法不過中用機關耳非妖也置一竹筒中用玻璃爲蓋有鑰開之開則向筒說數千言言畢卽閉傳千里內人開筒側耳其音宛如面談也過千里則音漸漸散不全矣忽一日自投于水鄉人驚救之半溺而起大恨曰吾今而知數之難逃也吾二子外遊于楚今日未時三刻理應同溺洞庭吾欲以老身代之今諸公救我必無人救二子矣不半月凶問果至此其弟子戴震爲余言

新齊諧卷十四

隨園戲編

勾魂卒

蘇州余姓者好鬪蟋蟀每秋暮攜盆往葑門外搜取薄夜方歸一日歸晚城門已閉余驚駭無計徘徊路側見二青衣遠來履橐橐有聲向余笑曰君此時將安歸乎我家離此不遠盍宿我家余喜從之至則雙扉大啟室中置舊書數部磁瓶銅爐各一余手持蟋蟀十數盆腹餓甚映燈而坐二青衣各持酒脯來相與對啖隱隱聞病者呻吟及衆人喧雜聲余問故二人曰此隣家患病者勢甚迫故也未幾漏下五鼓二人相與耳語曰事宜辦矣出靴中文書一道謂余曰請君呵氣紙上余不解其故笑而從之呵畢二青衣喜以腳踏屋上而舞長丈餘皆雞爪也余大驚正欲問之二人不見壁外哭聲大作余方知所遇非人是勾魂鬼也天明啟戶欲出則門外扃鎖甚固不得出乃大呼喪家人驚開鎖入以爲賊也爭毆之余具道所以且指蟋蟀盆爲證曰豈有行竊而攜此累墜物者乎喪家人亦有相識者始得免所餐酒脯盤盒俱喪家物也竟不知從何處携入己身亦不解從何而進

趙西席

山東按察司白映棠家延一西席姓趙名康友康熙丁卯孝廉賓主師弟俱各相得元宵張燈彼此宴飲散孝廉就寢書齋次日薄午不起有小僮戶外窺之見孝廉頭上插紙花雙枝兩手反接口微笑而目斜瞪赤身僵立僮大驚喚主人踣戶入則已死矣當胸一圓洞通于背大如碗中無心肝不知被何物探去插花反縛剝衣者像牲牢之形以戲之也

楊四佐領

楊四佐領者性直而和平四十餘忽謂家人曰昨夜夢金甲人呼我姓名云第七殿閻羅王缺無人補南嶽神已將汝奏上帝不日隨班引見汝速作朝衣朝冠候召予再三辭金甲神曰已經保奏無可挽回但喜所保者連汝共四人或引見時上帝不用則陽壽尙未絕言畢去夢兆如此決非偶然家中可速製朝衣冠以待家人聞之在疑信之間猶未喚縫人爲製衣也是夕金甲神又來喞曰命汝製新衣而緩懈何耶昨玉旨已降點汝作閻羅不必引見矣楊驚醒急語家人畢昏暈而逝俗例有接煞之說至期家人從俗行事有百戶胡姓者晚來臨奠過楊所居巷口見高燈旗纛中有蟒袍而盛服者疑爲巡城察院侍立路側方諦視間楊在車中大呼曰胡某毋恐我陰間到任少一判官將仗君助我胡驚懼自道親老不可卽死楊曰我已奏上帝事無可商汝親老吾亦知之當令我妹夫張某代汝養母言畢不見胡奔至家深悔臨奠之行與其母相對悵悵有叩門者持銀一封曰我楊四佐領之妹夫張某也昨夢閻羅王召去命以五十金助汝家養膳之費閻羅所命不敢有違故來奉贈且速駕也胡自知將死出外辭親友越三日卒

藍頂妖人

揚州商人汪春山家畜梨園有蘇人朱二官者色技俱佳汪使居徐甯門外花園一日隣人失火火及園朱逃出巷巷西有二美人倚門立以手招之朱遂入二美自稱亦姓汪春山族妹也語方濃一豹裘而藍頂者來云是二美之父年五十許強朱爲壻朱雖心貪女美而自訴家貧無以爲聘藍頂者云無妨一切費用我盡任之朱欲回蘇告父母藍頂者云汝歸蘇

可也但吾女貪汝貌而爲婚自知非偶切勿通知吾姪春山爲囑朱買舟同抵閩門語其父故木匠亦以娶媳無力爲辭藍頂者助錢二千爲婚費錢皆康熙通寶朱絲穿二官攜歸路遇數捕役尾之曰此朱繩穿錢乃某紳宦家壓箱錢汝爲盜驗矣將擒送官二官告以故一市之人聚觀以爲怪且曰必見藍頂者纔釋汝二官云吾岳翁以錢與我原約今日爲婚少頃新人花轎至矣君等伺之衆以爲然果遠聞鼓樂聲四人皆紅半臂昇花轎至衆人闕而往揭簾一青面獠牙者坐焉衆大駭并役亦奔散二官得脫于禍急歸家則藍頂者高坐堂中罵曰吾戒汝勿洩而汝竟告衆人且聚而捕我何味良若是呼杖杖之二女爲哀求免成婚匝月偕還揚州又歲餘二女置酒謂二官曰緣盡矣請郎還鄉二官不肯泣二女亦泣如是者數日藍頂者忽來驅逼其女二官攀衣不放藍頂者怒以手撮二官向空中擲之冥然墜地及醒已在虎邱後山

蒙化太守

無錫曹五輯爲雲南蒙化太守其子某庚午舉人江蘇巡撫莊滋圃之門生乾隆二十一年無錫大疫華劍光之子某素好行善出古畫數幅託孝廉售之囑曰得八百金爲本邑埋葬死人之費曹帶往蘇州以畫呈莊公莊念曹本義舉畫亦佳竟與八百金曹歸以八十金付華曰價只此華無奈何勉力補湊得數棺爲瘞其暴骨者餘棺猶有待也未幾孝廉病卒太守哀悼不已焚牒于東嶽神自稱居官清正子無罪不宜得此報歸而假寐見青衣人持東嶽神帖請往至大殿外神迎于階下曰公見責良是但爾子近爲不肖之行屯人之膏令千百人骨暴原野公不信可歸至爾子書齋啟笥視之言畢命人擁一囚至枷鎖銀鐺卽其子

也太守抱之哭驚醒急往其子書齋啓笥尙餘七百餘金詢其僕方知鬻畫匿價之事其子媳亦未知也太守自此哀子之思爲之少衰

店主還債

甘泉縣役鄒姓者月夜過西門大街夜已三鼓路無行人鄒見槐樹下小屋門開一女倚門立鄒僞吃烟取火者就之女勿避鄒喜攜女入屋坐凳上密談約以次日復往明早伺之槐樹下並無居人一厝棺小屋也從窗外窺條凳宛然凳上松痕有兩人並坐形迹心知鬼迷意忽忽不樂一日早起謂其妻曰有人欠我銀七兩二錢我將往索已而不反次日聞街前轟轟云某茶館有人飲茶暴卒館主人報官驗無他故飭店主買棺殮之招屍親識認妻聞往視果其夫也問主人棺價適符七兩二錢之數

許氏女報奶娘仇

杭州許某業鹽家生女纔四十日忽遍身紅腫而死五日後附魂於小婢口稱我爲你家家女兒命不該死實因奶娘不好自家貪睡將我放在大廳階簷下全不照管被左隣開喪人家煞神走過觸犯致死我今要向奶娘討命許氏爺娘聞之悲泣告以奶娘乃海甯人自汝死後彼已去矣從何處往報耶女云取身契看便知住處如其言乃注視良久曰勿勞爺娘我自會往報但燒紙船一隻與我許家燒與之婢蹶然起矣嗣後奶娘存亡許亦不復往問

蠱

雲南人家家畜蠱蠱能糞金銀以獲利每晚即放蠱出火光如電東西散流聚衆噪之可令墮地或蛇或蝦蟆類亦不一人家爭藏小兒慮爲所食養蠱者別爲密室命婦人喂之一見

男子便敗蓋純陰所聚也食男子者糞金食女子者糞銀此雲南總兵華封爲予言之

酖人取香火

杭州道士廖明募錢立聖帝廟塑像開光之日鄉城男婦蜂集拈香忽一無賴來昂然坐聖帝旁指像侮慢之衆人苦禁道士曰不必聽其所爲當必有報須臾無賴仆地呼腹痛盤滾不已遂死七竅血流衆大駭以爲聖帝威靈香火大盛道士以之致富逾年其黨分財不勻出首去年無賴之慢神乃道士賄之教其如此其死乃道士先以毒酒飲之而無賴不知也有司掘驗其骨果青黑色遂誅道士而聖帝香火亦衰

科場二則

江西周學士力堂癸卯鄉試題是學而優則仕一節文思幽奧房考張某不能句讀怒而批抹之置孫山外晚間各房考歸寢張忽囁語不止自披其頰曰如此佳文而汝不知尙忝然作房考乎自罵自擊不止家人以爲中風急請衆房考來檢視之得所抹周卷讀之俱不甚解乃曰試薦之何如大主考爲禮部侍郎任公蘭枝閱而驚曰此奇文通場所無可以冠多士也會副主考德公閱文倦假寐几上伺其醒告之德公問何字號曰男字第三號德曰不必閱文竟定解元可也任問故曰我寢方酣忽見金甲神向我賀曰汝第三兒子中解元矣今得男字三號之卷豈非其驗耶言畢閱文亦大加嘆賞遂定此科第一榜填後衆問周本房某夢中囁語之故茫然不知周後爲福建巡撫總督南河

雍正丙午江南鄉試其時聘各近省甲科司分校事皆少年英俊有張壘者科分旣久自居前輩性尤迂滯每晚必焚香祝天曰壘年衰學荒慮不稱閱文之任恐試卷中有佳文及其

祖宗有陰德者求神明暗中提撕衆房考笑其癡相與戲弄之折一細竿伺其燈下閱卷有所棄擲則於窗紙外穿入挑其冠如是者三張大驚以爲鬼神果相詔也即具衣冠向空拜又祝曰某卷文實不佳而神明提我想必有陰德之故如果然者求神明再如前指示我衆房考愈笑之俟其將棄此卷復挑以竿張不復再閱直捧此卷上堂而兩主司已就寢矣乃扣門求見告以深夜神明提醒之故大主考沈公近思閱其卷曰此文甚佳取中有餘君何必神道設教耶衆房考噤口不敢言及榜發見此卷已在榜中各譁然笑告張曰我輩弄君張正色曰此非我爲君等所弄乃君等爲鬼神所弄耳衆亦折服

狸稱表兄

六合老梅菴多狸夜出迷人在窗外必呼人字稱曰表兄人相戒不答則彼自去有夏姓少年讀書菴中月夜聞呼疑爲人也開牕答之見一婦人招手而貌頗粗惡意欲相拒竟被擁抱入室址脫下衣大吸其勢精盡乃去據云其力甚大不能自主且毛孔腥臊所經之處皆有餘臭經月始散

陸大司馬墳

杭州陸大司馬家方卜葬時其子某聽形家言以千金買清波門外地初下窆時啟得一棺形製甚偉衆戚友咸勸毋動舊棺別穿一穴陸不可曰我以重價買地彼何人敢占我耶掘而棄之是夕陸得病自批其頰口稱葛老太太云汝奪我安宅以而父爲尙書耶我兒子亦前明侍郎也問爲誰曰葛寅亮于誼爲鄉親于科名爲前輩汝父拋我骨汝父安乎陸大司馬夫人率全家泣請延僧齋醮燒紙錢十萬葛太太似有允意忽又作侍郎公語云傷我

母墳不可道也少頃又作族祖梯霞先生口吻從中說情侍郎終不允卒索其命去當鬼崇時陸有戚舒十九者新館選翰林歸在旁勸曰陸某以價買墳何名爲奪鬼在陸口罵曰後生小子新得一官敢來僂言恐自身難保耳陸亡後月餘舒亦亡

鬼受禁

上虞令邢某與妻素不睦因角口批其頰妻怒自縊三日後見形爲祟伺邢與妾臥便吹冷風揭帳或滅其燈邢怒請道士持呪作法攝鬼於東廂而以符封之加官印焉鬼竟不至亡何邢調知錢塘後任上虞者來開廂房鬼得出遂附一小婢身作祟如故後任官呼鬼語曰夫人與邢公有仇與小婢無涉何故害之鬼曰非敢害丫鬢我借附他身以便求公問何求曰送我到錢塘邢某處曰夫人何不自行曰我枉死之鬼沿路有河神攔截非公用印文關遞不可并求簽兩差押送問差何人曰陳貴滕盛二人者皆已故役也後任官如其言焚批文解送之邢公方在寢室晚膳其妾忽倒於地大呼曰汝太無良汝逼我死乃禁我於東廂受飢餓耶我今已歸來不與汝干休自此錢塘署中日夜不甯邢不得已再請道士作法加符用印封移錢塘獄中鬼臨去呼曰汝太喪心前封我於東廂猶是房舍今我何罪而置我於獄乎我有以報汝矣未逾月獄有重犯自縊死邢因此被劾罷官大懼誓將割髮爲僧雲遊天下同寅官有捐貲助其衣鉢者未及行而病卒

狐鬼入腹

李鶴峯侍郎之子鵠字醫山辛巳翰林能詩文兼好宋儒理學燈下讀書忽兩女子絕美來與戲狎李不爲動少頃李晚膳畢忽腹中呼曰我附魂茄子上汝啖茄即啖我也我已居汝

腹中汝復何逃卽燈下女子聲李自此兩目愴然若迷若痴或以手自批其頰或大雨首頂一石跪雨中衣裳淋漓不敢入內或對人膜拜拉之不起面色黃瘦日漸不支鬼常借李君手作字與人酬答其同年蔣君士銓往視之問汝貌甚佳何不來誘我而必從李君耶李手書二字曰無緣蔣又問汝絕世佳人何爲居腹中污穢之地李手書二字罵曰下足時江西巡撫吳公與侍郎善乃招李往爲延張天師設壇於滕王閣齋三日誦呪三日其法官懸牌曰三月十五日拏妖臨期觀者如堵天師上坐法官旁坐令李跪張其口向法師法師申兩指入其口撮而擲之一小狐如貓從口中出呼曰我爲姊探信不料被擒姊愼毋出腹中應聲曰唯方知腹中尙有一妖天師封符於禪投之大江李微覺神清而腹中嘆息之聲大作曰我與汝有宿世冤因尋汝不著故拉仙姑同來不料反爲彼禍使我心轉不安我愈不饒汝矣言畢腹痛不止天師問法官李翰林可救乎法官取鏡照其腹曰此是翰林前生冤鬼非妖也法籙不能治天師以告中丞中丞亦無奈何仍送李還家養病遂卒

怪詐人父

李玉雙孝廉家有婢名春雲頗有姿年十五李欲納爲妾與其妻有成說矣春雲白日見瓦上一男子下擁其髻而嗅之曰汝髮甚香當大貴宜從我勿從主人主人處館窮儒雖中舉不過一教官終耳你向主人言命其讓我且供我酒饌我便贅汝家玉雙聞之大怒然亦無如何是夜怪竟來與婢配合婢求主人具酒饌如其言則日夜安甯否則飛磚擲瓦之禍畢作玉雙不得已與人謀將此屋招人承買玉雙館於望仙橋施氏不常在家一日者商人孫耕文來看屋敲門有蒼鬚老翁衣灰鼠袍出迎搖手曰此屋是我祖遺並未出賣勿聽小兒

玉雙妄語私相授受將來要受訟累孫大駭走告玉雙責以父在子不得自專玉雙曰先君亡已十餘年家中並無此翁乃知爲怪所擲揄冒認爲父彼此大笑自後人知屋有怪屢賣不成玉雙乃命婢父母領女還家勿索身價婢裂面剪髮誓不肯歸其母慮爲怪所害以繩縛之網載還家另嫁一士人怪竟不來

皂莢下二鬼

丹陽南門外呂姓者有皂莢園取利甚大每結實時呂氏父子守之防有偷者一夕月下其父坐石上看樹樹下有蓬髮髻然從土中出懼而不視呼其子往曳之有紅衣女子闖然起父驚仆地其子狂奔入室女追之至大門忽僵立不動一足在門外一足在門內子大呼家人持刀杖齊集畏其冷氣射人俱不敢近女子從容起行僵身入牀下遂不見其子持薑湯灌醒其父扶以歸招鄰人共掘牀下果一朱棺中有紅衣女尸如夜所見嗣後父子不敢看園守樹矣逾三日皂莢樹下又有仆於地者呂氏子亦灌醒之問其由來曰我西鄰也見君家皂莢甚多無人看守故來偷竊不意見樹下有無頭人以手招我故駭而仆地其子又集人掘之得黑棺埋一無頭尸皆僵不腐聚而焚之其怪遂絕

中山王

江甯布政司署爲徐中山王故府中有甯安殿供奉中山王像一几一椅灰高數寸例不敢拭拭者有災帳幙桌幃俱以黃綾爲之乾隆四十年方伯某上任之日即往行香心念中山王爵雖貴亦人臣也帷幔黃色似乎太僭命以紅綾易之是夕火光照耀急往視之則一帳一帷俱已焚盡而几案絲毫無傷細查並無引火之物於是悚然怖懼仍以黃色綾易之

狀元不能拔貢

狀元黃軒自言作秀才時屢試高等乙酉年上江學使梁瑤峯愛其才以拔貢許之臨試之日頭暈目眩握筆一字不能下梁不得已以休甯縣生員吳鶴齡代之及榜出後病乃霍然從此灰心於功名自望得一縣佐州判官心足矣後三年竟連捷以至廷試第一而吳鶴齡遠館溧水以傷寒病終終於貢生

謹權量

方敏愨公署直隸按察使時饒陽民婦侯蕭氏拒姦被殺有周秋者迹可疑而狡詐不肯吐實懸案二載公閱案牘盡三鼓坐而假寐夢一人持素紙下寬上窄缺左角中有方孔孔下有謹權量三字寤後細思周字下寬左缺而謹權量三字皆土字在下移土之文於方孔之上則成周字且月令謹權量三字乃秋政也兇人爲周秋無疑矣一訊而服此事載公行狀中

拘忌

塞侍郎某性多拘忌每遇人談有死喪二字必作噴嚏以啐散之路逢殯柩則急往親友家解下衣帽撲散數次以爲將晦氣撒在人家與己無與矣又薛生白常往李侍郎家看病清晨往待至日午始出侍郎以面向內以背向外兩公子扶之而行坐定診脈口答病源終不回顧薛大駭疑其面有惡疾故不向客問其家人家人云主人貌甚豐滿並無惡疾所以然者以某日喜神方在東故不肯背之而出又是日辰巳有衝故必正午方出耳

奇術

康熙間成其範善風角三藩之變成爲中書凡千里外用兵之事日有所奏皆奇驗以此官至理藩院侍郎常赴席東華門張參領家已坐定矣忽脫冠帶置几上謂主人曰我腹痛將如廁出門呼其輿夫飛奔而歸輿夫問故搖手曰我與汝三人皆此日劫數中人我不敢不到故留衣冠以厭之言未畢東華門火藥局火發延燒數十家張參領家已爲灰燼又有計小堂者以妖言惑衆充發黑龍江至旅店中飯桌仄小解差三人不能同坐小堂以手址之頃刻桌長三尺差役曰汝以此得罪尙不悛改而作此狡獪乎小堂怒而起拉其所乘馬送入牆內僅留一尾在外搖擺差哀求乃拔其尾而出之至配所與某將軍交善一日忽來泣曰緣盡矣不知何時再見揮手作別將軍留之不可但見小堂冉冉升空而去將軍速到彼帳中訪之則已死矣

狐仙自縊

金陵評事街張姓屋西書樓三間相傳有縊死鬼人不敢居封鎖甚密一日有少年書生盛衣冠而來求寓其家張辭以家無空屋書生愠曰汝不借我我自來居日後冒犯無悔張聞其言知爲狐仙詭云西邊書房三間可以奉借因此房有鬼私心欲狐仙居爲之驅除然口不言其故書生喜揖謝而去次日聞樓中有笑語聲連日不斷張知狐仙已來日具雞酒供之未半月樓上寂然無聲張疑狐仙已去將重封鎖其門上樓視之有黃色狐自縊於梁上

高白雲

四川高白雲先生名辰辛未翰林長于天文占驗之學嘗就館于岳大將軍家宰婁縣觀星象知山東氛惡已而果有王倫之事未遇時請乩仙問終身仙贈詩云少時志業蛟潛壑老

去功名鳳峙岡先生不解後由祠部主事陞鳳陽府同知未到任卒其子扶櫬來江甯厝于儀鳳門外方悟乩仙第二句之應

梁觀察夢應

廣東梁兆榜觀察其族某素奉佛妻有娠夢觀音大士謂曰汝生子可名兆榜將來是三甲第八名進士驚醒果生一男夫婦甚喜以兆榜名之卽爲捐監以待入場及年長頑蠢異常不能識字留監照無用乃以與族姪使下場卽觀察也果庚午辛未連捷會試出侍郎雙公門將殿試時雙公欲爲送表聯於讀卷官觀察辭曰門生先有夢兆已定爲三甲第八名進士殿試前列似難以人謀也雙公笑而不信殿試榜發竟得二甲六十八名雙公愈笑其誕觀察亦疑夢之不足憑矣是科進呈十卷第一名爲某相國之子改拔杭州吳鴻爲狀元嫌二甲八十名太多命分二十卷置三甲於是梁公仍爲三甲第八名進士雙公嘆曰易稱聖人先天而天不違斯言信矣

大脩人

壬辰二月間余過江甯縣前見道旁爬一男子年四十餘有鬚身面縮小背負一肉山高過於頂黃脹膨亨不知何物細視之有小竅而陰毛圍之方知是腎囊也囊高大兩倍於其身而拖曳以行竟不死乞食於途

錢文敏公夢辛稼軒而生

錢文敏公維城初名辛來以其尊人夢辛稼軒而生公故也改名後乃字稼軒以存夢識乙丑科前四月夢行天榜狀元李某已爲探花榜眼不著姓名後榜發公爲狀元而李某竟在

二甲以知縣用亦不可解

鬼入人腹

焦孝廉妻金氏門有算命瞽者過召而試之瞽者爲言往事甚驗乃贈以錢米而去是夜金氏腹中有人語曰我師父去矣我借娘子腹中且住幾日金家疑是樟柳神問是靈哥兒否曰我非靈哥乃靈姐也師父命我居汝腹中爲崇嚇取財帛言畢卽捻其腸肺痛不可忍焦乃百計尋覓前瞽者數日後遇諸途擁而至室許除患後謝以百金瞽者允諾呼曰二姑速出如是者再內應曰二姑不出矣二姑前生姓張爲某家妾被其妻某凌虐死某轉生爲金氏我之所以投身師父作樟柳神者正爲報此仇故也今旣入其腹中不取其命不出瞽者大驚曰旣是宿孽我不能救遂逃去焦懸符拜斗終于無益每一醫至腹中人曰此庸醫也藥亦無益且聽入喉或曰此良醫也藥恐治我便扼其喉藥吐而後已又曰汝等軟求我尙可若用法律治我先嚙其心肺嗣後每聞招僧延道金氏便如萬刃刺心滾地哀號且曰汝受我如此煎熬而不自尋一死何看性命太重耶焦故彭芸楣侍郎門生彭聞之欲入奏誅瞽者焦不欲聲揚求寢其事金氏奄奄垂斃此乾隆四十六年夏間事

牛僵尸

江甯銅井村人畜一牝牛十餘年生犢凡二十八口主人頗得其利牛老不能耕宰牛者咸請買之主人不忍遣童喂養俟其自斃乃掩埋土中是夜聞門外有擊撞聲如是者連夕初不意卽此牛月餘爲祟更甚聞吼聲蹄響於是一村之人皆疑此牛作怪掘驗之牛尸不壞兩目閃閃如生四蹄爪皆有稻芒似夜間破土而出者主人大怒取刀斷其四蹄并剖其腹

以糞穢沃灌之嗣後寂然再啟土視之牛朽腐矣

袁州府署大樹

江西袁州府署後園有大樹高十餘丈每夜有兩紅燈懸其巔或近視之必有泥沙拋擲春夏則蜈蚣蛇蠍下焉人以故不敢狎褻乾隆年間有敏姓者來爲太守惡其爲妖召匠數人持刀斧伐樹賓僚妻子無不諫者太守不爲動自坐胡牀督匠伐樹樹上飛下白紙一張上有字數行墜太守懷中太守視之色變而起趣揮匠散至今大樹猶存然終不知紙上作何語太守亦終不爲人言

燧人鑽火樹

四川苗洞中人跡不到處古木萬株有首尾闊數十圍高千丈者邛州楊某爲採貢木故親詣其地相度羣樹有極大楠木一株枝葉結成龍鳳之形將施斧鋸忽風雷大作冰礮齊下匠人懼而停工其夜刺史夢一古衣冠人來拱手語曰我燧人皇帝鑽火樹也當天地開闢後三皇遞興一萬餘年天下只有水並無火五行不全我憐君民生食故捨身度世教燧人皇帝鑽木出火以作大烹先從我根上起鑽至今灼痕猶可驗也有此大功君其忍鋸我乎刺史曰神言甚是但神有功亦有過神問何也曰凡食生物者腸胃無烟火氣故疾病不生且有長年之壽自水火既濟之後小則瘡痔大則痰壅皆火氣熏蒸而成然後神農皇帝嘗百草施醫藥以相救可見燧人皇帝以前民皆無病可治自火食後從此生民年壽短矣且下官奉文採辦不得大木不能消差奈何神曰君言亦有理我與天地同生讓與天地同盡我有曾孫樹三株大蔽十牛儘可合用消差但兩株性恭順祭之便可運斤其一株性崛

強須我諭之纔肯受伐次日如其言設祭施鋸果都平順及運至川河忽風浪大作一木沉水中萬夫曳之卒不起

鬼怕冷淡

揚州羅兩峰自言能見鬼每日落則滿路皆鬼富貴家尤多大概比人短數尺面目不甚可辨但見黑氣數段旁行斜立呢呢絮語喜氣煖人旺處則聚而居如逐水草者然揚子雲曰高明之家鬼瞰其室言殊有理鬼逢牆壁窗板皆直穿而過不覺有礙與人兩不相關亦全無所妨一見面目則是報冤作祟者矣貧苦寥落之家鬼往來者甚少以其氣衰地寒鬼亦不能甘此冷淡故也諺云窮得鬼不上門信矣

鬼避人如人避烟

兩峯云鬼避人如人之避烟以其氣可厭而避之並不知其爲人而避之也然往往被急走之人橫衝而過則散爲數段須團湊一熱茶時方能完全一鬼其光景似頗喫力

賣蒜叟

南陽縣有楊二相公者精于拳勇能以兩肩負糧船而起旗丁數百以篙刺之篙所觸處寸寸折裂以此名重一時率其徒行教常州每至演武場傳授槍棒觀者如堵忽一日有賣蒜叟龍鐘偃僕咳嗽不絕聲旁睨而挪揄之衆大駭走告楊楊大怒招叟至前以拳打磚牆陷入尺許傲之曰叟能如是乎叟曰君能打牆不能打人楊愈怒罵曰老奴能受我打乎打死勿怨叟笑曰老人垂死之年能以一死成君之名死亦何怨乃廣約衆人寫立誓券令楊養息三日老人自縛于樹解衣露腹楊故取勢于十步外奮拳擊之老人寂然無聲但見楊雙

膝跪地叩頭曰晚生知罪了拔其拳已夾入老人腹中堅不可出哀求良久老人鼓腹縱之已跌出一石橋外矣老人徐徐負蒜而歸卒不肯告人姓氏

借棺爲車

紹興張元公在閩門開布行聘夥計孫某者陝人也性誠謹而勤所經算無不利市三倍以故賓主相得三五年中爲張致家資十萬屢乞歸家張堅留不許孫怒曰假如我死亦不放棄歸乎張笑曰果死必親送君歸三四千里我不辭勞又一年孫果病篤張至床前問身後事曰我家在陝西長安縣鐘樓之旁有二子在家如念我前情可將我靈柩寄歸付之隨即氣絕張大哭深悔從前苦留之虐又自念十萬家資皆出渠幫助之力何可食言不送乃具賻儀千金親送棺至長安叩其門開長子出見告以尊翁病故原委爲之泣下而其子夷然但喚家人云爺柩旣歸可安置廳旁旣無哀容亦不易服張駭絕無言少頃次子出見向張致謝數語亦揚揚如平常張以爲此二子殆非人類豈以孫某如此好人而生禽獸之二子乎正驚嘆間聞其母在內呼曰行主遠來得毋饑乎我酒饌已備惜無人陪奈何兩子曰行主張先生父執也卑幼不敢陪侍其母曰然則非汝死父不可命二子肆筵設席而已持大斧出劈棺罵曰業已到家何必裝痴作態死者大笑掀棺而起向張拜謝曰君真古人也送我歸死不食言張問何作此狡獪曰我不死君肯放我歸乎且車馬勞頓不如臥棺中之安逸耳張曰君病旣愈盍再同往蘇州曰君命中財止十萬我雖再來不能有所增益留張宿三日而別終不知孫爲何許人也

孫伊仲

常州孫文介公元孫伊仲赴江陰應試舟泊于野天將夕矣路見古衣冠者問何去曰應試其人咤曰功名富貴可襲取乎水源木本可終絕乎此之不知應試何爲言畢不見伊仲恍惚如夢歸至舟中欲不應試同人勸行不得已仍至江陰患瘧甚劇莽熱時見古衣冠者又來曰爾無父我無子風雨霜露哀哉傷心伊仲悚然即買舟南歸以此言告本族方知文介公本無子嗣其宗人爲子後其家子孫皆嗣子所出而嗣子之墓久不可考矣趙恭毅公孫刑部郎中某代訪得消息墓爲沈氏所佔乃爲助錢議贖還之此乾隆四十三年事

新齊諧卷十五

隨園戲編

姚端恪公遇劍仙

國初桐城姚端恪公爲司寇時有山西某以謀殺案將定罪某以十萬金賂公弟文燕求寬文燕允之而憚公方正不敢向公言希冀得寬將私取之一夕者公於燈下判案忽梁上男子持匕首下公問汝刺客耶來何爲曰爲山西某來公曰某法不當寬如欲寬某則國法大壞我無顏立於朝矣不如死指其頸曰取客曰公不可何爲公弟受金曰我不知曰某亦料公之不知也騰身而出但聞屋瓦上如風掃葉之聲時文燕方出京赴知州任公急遣人告之到德州已喪首於車中矣據家人云主人在店早飯畢上車行數里忽大呼好冷風我輩急送綿衣往視頭不見但血淋漓而已端恪題刑部白雲亭云常覺胸中生意滿須知世上苦人多

吳髻

揚州吳髻行九鹽賈子也年二十將往廣東某藩司署中贅娶舟至滕王閣下白晝見一女與公差來舟中云尋君三世今日得見面矣吳髻茫然不知所來家人知爲窺鬼日以苜蓿帚打其見處無益也從此吳髻言語與平時迥異由江西以及廣東二鬼皆不去入贅之日女鬼忽入洞房索其坐位與新人爭上下惟新人與吳髻聞其聲云我本漢陽孀婦與吳狎呢遂訂婚姻以所畜萬金與至蘇州買屋開張布字號訂明月日來漢陽迎娶不意吳挾金去五年竟無消息我因自經死到黃泉哭訴漢陽城隍移查蘇州城隍回批云此人已生湖南

尋至湖南訴城隍又查明已生揚州及至揚州而吳又來廣東追至江西始得相逢今日婚姻之事我不能阻但須同享榮華等語新人大駭白之藩臺不得已竟虛其位待之始得安然鬼差口索杯箸求食乃另設席相待閱一月吳髯告歸買舟回揚鬼亦索輿甚迫欲隨其輿以登舟揚州士人早知此事而不信于吳髯抵揚之日填街塞巷以待其歸見其四輿入城前果二空輿肩輿者亦覺其若有人坐一時好事者作再生緣傳奇閱半月吳髯妻與女鬼約修道場七日焚冥鑑于瓊花觀中勸之去女鬼欣然諾之其時鬼差已去道場中設女魂牌于殿之西側每日吳髯妻設席親祭至第七日大雨遣家人往供家人失足跌于路卽供以泥污之饌鬼大嚷不止吳髯責其家人而髯妻又約以九日道場圓滿之故女鬼向髯妻稱謝謂吳髯曰後十年來再索汝命我且暫去髯懼捨身爲城隍役至期則白日睡去至今揚之人皆知吳九鬚子爲活勾差

麻林

長隨麻林與李二交好李以貧死而林家資頗厚一夕夢李登其牀責之曰我與汝平日兩弟兄頗莫逆今我死無子孫汝不以一豚蹄見祭我墳何忍心也林唯唯許諾李起身出戶而林猶覺胸腹上有物相壓者疑李魂未散急起視之乃一小豬壓被上尿矢淋漓方知李魂附豬而來也心大省悟卽縛小豬賣之得二千文爲備酒肉親至其墳祭之

鶴靜先生

厲樊榭未第時與周穆門諸人好請乩仙一日有仙人降盤書曰我鶴靜先生也平生好吟故來結吟社之歡諸君小事問我我有知必告大事不必問我雖知亦不敢告嗣後凡杭城

祈晴禱雨止瘡斷痢等事問之必書日期開藥方皆驗其他休咎則筆臥不動每日祈請但書鶴靜先生四字向空焚之仙輒下降有所唱和詩尤清麗和雁字至六十首如是一年樊榭穆門請與相見拒而不許諸人再四懇求曰明日下午在孤山放鶴亭相候諸公臨期放舟伺之至日昃無所見疑其相誑各欲起行忽空中長嘯一聲陰風四起見偉丈夫鬚長數尺紗帽紅袍以長帛自挂于石牌樓上一閃而逝疑是前朝忠臣殉節者也自此乩盤再請亦不至矣惜未問其姓名

門戶無故自開

孫叶飛先生掌教雲南五華書院正月十三夜院門無故自開樞限皆脫以爲大奇次日城中轟傳家家門戶昨晚皆無故自開不知是何妖異伺之月餘大小平安了無他故

黃陵元鶴

陝西黃帝陵向有兩元鶴相傳爲上古之鳥朔望飛鳴居人可望不可卽乾隆初年又有二小鶴同飛羽色亦黑一日忽空中飛下大雕以翅撲小鶴幾爲所傷老鶴知之雙來啄雕格鬪良久雲雷交至雕死崖石上其大可覆數畝土人取其翅當作屋瓦蔭庇數百家

土地迎舉人

休甯吳衡浙江商籍生員乾隆乙酉鄉試榜發前一日其家老僕夜臥忽醒喜曰相公中矣問何以知之曰老僕夜夢過土地祠見土地神駕車將出自鎖其門告我曰向例省中有中式者土地例當迎接我現充此差故將啟行汝主人即我所迎也吳聞之心雖喜終不信已而榜發果中第十六名

孫烈婦

歙縣紹村張長壽妻孫氏父某工武藝孫自幼從父學年及笄歸長壽長壽家貧娶婦彌月即客浙西有賊數人窺婦年少夜往撬其門將行不良婦左手執燭右手持挺與賊鬪賊被創仆地而逃又一年長壽病死婦從容執喪事既葬閉戶自縊隣人以婦強死懼其爲崇集僧作佛事超度之夜將半僧方誦經見婦坐堂上叱曰我死于正命並非不當死而死者何須汝輩禿奴來此多事僧皆驚散後村有婦某與人有私將弑夫者忽病狂呼曰孫烈婦在此責我不敢不敢嗣後合村奉孫如神

小芙

黟北王氏婦夢美女子認己爲男子而與之合曰我番禺陳家婢小芙也子前身爲僕與我有約而事露我憂鬱死愛緣未盡故求續歡婦醒即病顛屏夫獨居時自言笑皆男子褻語忘己之爲女身也久之小芙白晝現形家人百計驅之莫能遣會隣舍不戒于火小芙呼告王氏得免于難王家德之聽其安居年餘一夕謂婦曰我緣已盡且得轉生矣抱婦大哭稱與哥哥永訣婦顛病即已後竟無他

鬼寶塔

杭人有邱老者販布營生一日取帳回投宿店家店中人滿前路荒涼更無止所與店主商量主人云老客胆大否某後牆外有骰子房數間日久無人歇宿恐藏邪祟未敢相邀邱老曰吾計半生所行不下數萬里何懼鬼爲於是主人執燭偕邱老穿室內行至後牆外視之空地一方約可四五畝貼牆矮屋數間頗潔淨邱老進內見桌椅牀帳俱全甚喜主人辭出

邱老以天熱坐戶外算帳是夕淡月朦朧恍惚間似前面有人影閃過邱疑賊至注目視之忽又一影閃過須臾連見十二影往來無定如蝴蝶穿花不可捉摸定睛熟視皆美婦也邱老曰人之所以畏鬼者鬼有惡狀故也今豔冶如斯吾即以美人視鬼可矣遂端坐看其作何景狀未幾二鬼踞其足下一鬼登其肩九鬼接踵以登而一鬼飄然據其頂若戲場所謂搭寶塔者然又未幾各執大圈齊套頸上頭髮俱披舌長尺餘邱老笑曰美則過于美惡則過于惡情形反覆極似目下人情世態看汝輩到底作何歸結耳言畢羣鬼大笑各還原形而散

棺蓋飛

錢塘李甲素勇夕赴友人宴酒酣座客云離此間半里有屋求售價甚廉聞藏厲鬼故至今尚無售主李云惜我無錢說也徒然客云君有膽能在此中獨飲一宵僕當貨此室奉君衆客云我等作保即以明晚爲訂次午作隊進室安放酒餚李帶劍升堂衆人闔戶反鎖去借隣家聚談候信李環顧廳屋其傍別開小門轉身入有狹術荒草蒙茸後有環洞門半開半掩李心計云我不必進去且在外俟其動靜乃燒燭飲酒至三更聞腳步聲見一鬼高徑尺臉白如灰兩眼漆黑披髮自小門出直奔筵前李怒挺劍起其鬼轉身進術李逐至環洞門內頃刻狂風陡作空中棺蓋一方似風車兒飛來向李頭上盤旋李取劍亂斫無奈頭上愈重身子漸縮有泰山壓卵之危不得已大叫其友伴在隣家聞之率衆入見李將被棺蓋壓倒乃併力搶出背負而逃後面棺蓋追來李愈喊愈追雞叫一聲蓋忽不見于是救醒李甲連夜擡歸次日共詢房主方知後園矮室停棺時時作祟專飛蓋壓人死者甚衆於是鳴于

官焚以烈火其怪乃滅李病月餘始愈常告人曰人聲不如雞聲豈鬼不怕人反怕雞耶

油瓶烹鬼

錢塘周軼韓孝廉性豪邁某年暑甚偕七八人暮夜泛湖行至丁家山下一友曰吾聞淨慈寺長橋左側多鬼曷往尋之或得見其真面可供一笑衆相憇憑上岸同行橋邊見扳夜網者挈魚而走孝廉熟視是其管墳人也乃云此網借我一用明早奉還管墳人允之遂付僕從肩馱此網而行衆友詢故孝廉云余將把南屏山下鬼一網打盡各大笑遂揀山僻小路步去是夜月明如晝見前林中有一婦紅衫白裙舉頭看月衆友云此時夜深必無女娘在外是鬼無疑誰敢作先鋒者孝廉願往大步前進相去半箭許冷風吹來婦人回身滿面血流兩眼倒挂孝廉戰慄僵立不行連聲呼網來網來衆人向前一網打去不見形迹網中僅得枯木尺許攜歸敲管墳者門借利鋸寸寸鋸開有鮮血淋漓乃買主人點燈油一瓶攜上船尾然火烹油將鋸斷枯木送入瓶中一時飛起青烟竟成焦炭衆人達旦入城告親友云昨夜油瓶烹鬼大是奇事

無門國

呂恆者常州人販洋貨爲業乾隆四十年爲海風所吹舟中人盡沒惟呂抱一木板隨波掀騰飄入一國人民皆樓居樓有三層者五層者祖居第三層父居第二層子居第一層其最高者則曾高祖居之有出入之戶無遮闌之門國人甚富無盜竊事呂初到時言語不通以手指畫久之亦漸領解聞是中華人頗知禮敬其俗分一日爲兩日雞鳴而起貿易往來至日午則舉國安寢日斜時起照常行事至戌時又睡矣問其年稱十歲者中國之五歲也稱

二十者中國之十歲也呂所居處離國王尚有千里無由得見官員甚少有儀從者呼爲巴羅亦不知是何職司男女相悅爲婚好醜老少各以類從無攙越勉強致嗟怨者刑法尤奇斷人足者亦斷其足傷人面者亦傷其面分寸部位絲毫不爽姦人子女者使人亦姦其子女如犯人無子女則削木作男子勢狀椽其臀竅呂居其國十有三月因南風之便附船還中國據老洋客云此島號無門國從古來未有通中國者

宋生

蘇州宋觀察宗元之族弟某幼孤依叔叔待之嚴七歲時赴塾師處讀書偷往戲場看戲被人告知其叔懼不敢歸逃于木瀆鄉作乞丐有李姓者憐而收留之俾在錢鋪傭工頗勤慎遂以婢鄭氏配之如是者九年宋生頗積資財到城內燒香遇其叔於途勢不能瞞遂以實告叔知其有蓄勸令還家別爲擇配生初意不肯且告叔云婢已生女矣叔怒曰我家大族豈可以婢爲妻逼令離婚李家聞之情願認婢爲女另備妝奩陪嫁叔不許命寫離書寄鄭而別爲娶于金氏鄭得書大哭抱其女自沉于河越三年金氏亦生一女其叔坐轎過王府基忽旋風括簾而起家人視之痰湧氣絕頸有爪痕是夜金氏夢一女子披髮瀝血訴曰我鄭氏婢也汝夫不良聽從惡叔之言將我離異我義不再嫁投河死今我先報其叔當即來報汝夫與汝無干汝毋怖也但汝所生之女我不能饒以女易女亦是公道報法妻醒告宋生生大駭謀之友友曰元妙觀有施道士能作符驅鬼俾其作法牒之豐都可也乃以重幣賂施施取女之生年月日寫黃紙上加天師符押解豐都其家果平靜三年後生方坐書窗白日見此婢來罵曰我先拏汝叔遲拏汝者爲惡意非從汝起且猶戀從前夫妻之情故也

今汝反先下手牒我豐都何不良至此今我業限已滿將冤訴與城隍神神嘉我真烈許我報仇汝復何逃宋生從此痴迷不省人事家中器具無故自碎門撐棍棒空中亂飛舉家大懼延僧超度終于無益十日內宋生死十日外其女死金氏無恙

屍香 二則

杭州孫秀姑年十六爲李氏養媳李翁挈其子遠出家只一姑年老矣隣匪嚴虎窺秀姑有色借乞火爲名將語挑之秀姑不從乃遣所嬖某作餌搔頭弄姿爲蠱惑計秀姑告其姑姑罵斥之嚴虎大怒詈曰女奴不承擡舉我不淫汝不止朝夕飛磚擣門李家素貧板壁單薄絕少親友嚴又無賴隣人無敢撻其鋒于是婆媳相持而哭一日者秀姑晨起梳頭嚴與其嬖登屋上各解褲挺其陽以示之秀姑不勝忿遂密縫內外衣重重牢固而私服鹽鹵死其姑哀號欲告官無爲具呈者忽有異香從秀姑所臥處起直達街巷行路者皆愕眙相視嚴虎知之取死貓死狗諸穢物羅置李門外以亂其氣而其香愈盛適有總捕廳某路過聞其香怪之查問街隣得其寃乃告知府縣置嚴虎于法而旌秀姑于朝至今西湖上牌坊猶存荆州府范某鄉居家甚富而早卒子六歲倚其姊以居姊年十九能書解算料理家務甚有法族匪范同欺其弟幼屢來借貸姊初應之繼爲無厭之求姊不能應范同大怒與其黨謀去其姊爲吞噬計乃俟城隍賽會時沉其姊於河又縛沉一錢店少年以兩帶束其屍報官相驗云平素有姦懼人知覺故相約同死縣官信之命棺殮掩埋而已范氏家產盡爲族匪所占逾年荆州太守周鍾宣到任過范女墳有異香從其墳起問書役中有知其寃者爲白其事乃掘男女兩墳驗之屍各如生手足頸項皆有捆縛傷痕于是拘訊范同則數日前已

爲厲鬼崇死矣太守具酒食香紙躬祭女墳表一碣曰貞女范氏之墓窀穸後兩屍俱腐化
儲梅夫府丞是雲麾使者

儲梅夫宗丞能養生七十而有嬰兒之色乾隆庚辰正月奉使祭告嶽瀆宿搜敦郵亭是夕
旅店燈花散采倏忽變現如蓮花如如意如芝蘭噴烟高二三尺有風霧回旋急呼家童觀
之共爲詫異相戒勿動是夕夢見羣仙五六人招至一所上書赤雲岡三字呼儲爲雲麾使
者諸仙列坐松陰聯句有稱海上神翁者首唱曰蓮炬今宵獻瑞芝次至五松丈人續曰羣
仙佳會飄吟髭又次至東方青童曰春風欲換楊柳枝旁一女仙笑曰此雲麾使者過凌河
句也汝何故竊之相與一笑忽燈花作爆竹聲驚醒

唐配滄

武昌司馬唐配滄杭人也素有孝行卒于官後五年其長子在亭遠館四川長媳郭氏在杭
病劇忽作司馬公語云冥司念我居官清正勅爲武昌府城隍念爾等新作人家我旣無遺
物與汝輩新婦頗勤儉特來救護但須至獅子橋覓劉老娘來託他禳解伊次子字開武者
往覓得邀至家中即杭俗所稱活無常也問此病汝能救否答云我奉冥司勾捉何敢私縱
今爾家太爺去向閻羅王說情或得生亦未可定因問你見太爺何在答云此刻現在向竈
神說話少頃曰太爺出門想至冥府去了病者靜臥不言逾時曰太爺來病者即大聲曰汝
已得生無慮也是時視病者有親友在座郭氏作司馬語各道款洽宛如生前其次子因跪
請云父旣爲神應預知休咎兒輩將來究作何結局司馬厲聲曰做好人行好事自有好日
何得預問又云我今日爲自家私事勤勞廟中夫役速焚紙錢并給酒飯酬之語畢病者仍

復原音病亦自愈此乾隆二十四年五月事至今郭氏尙存

裘文達公爲水神

裘文達公臨卒語家人曰我是燕子磯水神今將復位死後汝等送靈柩還江西必過此磯有關帝廟可往求籤如係上上第三籤者我仍爲水神否則或有譴謫不能復位矣言終卒家人聞之疑信參半蒼頭某信之獨堅曰公爲王太夫人所生太夫人本籍江甯渡江時曾求子于燕子磯水神廟夜夢袍笏者來曰與汝兒并與汝一好兒果逾年生公公妻熊夫人挈柩歸至燕子磯如其言卜于關帝廟果得第三籤遂舉家大哭燒紙錢蔽江立木主于廟旁旁有尹文端公詩碣予往蘇州阻風于此乃揖其主而題壁曰燕子磯邊泊黃公壩下過摩挲舊碑碣惆悵此山阿短鬢皤皤雪長江渺渺波江神如識我應送好風多次日果大順風

莊生

葉祥榴孝廉云其友陳姓家延西席莊生八月間日暮諸生課畢陳姓弟兄奔于書齋莊傍觀之倦起身歸家莊家離陳姓里許須過一橋莊生上橋失足跌地急起趨家扣門不應仍返陳氏齋陳弟兄奔局未終乃閒步庭院見軒後小門內有園亭巨蕉無數心嘆主人有此雅室不作書齋再數步見小亭中孕歸臨褥色頗美心覺動旣而曰此東人內室見此不退非禮也趨出仍至齋中小坐見主人棋爲乃弟暗攻主人他顧若不覺者代爲通知主人張皇似驚仍復不傑莊復大聲呼曰不依我全盤輸了且以手到局上指告陳氏兄弟驚惶趨內燈爲之熄莊不得已仍回家至橋復又一跌起赴家扣門闔者納焉莊以前次扣門不應

之事罪其家人家人曰前未聞也莊次日赴館見燈盞在地棋局尙存恍然若夢少頃主人出曰昨夜先生去後鬼聲大作甚至滅火真怪事莊駭然告以曾來教棋東人曰吾弟兄並未見先生復至莊曰且有一證我到尊府花園見有臨禡婦人陳笑曰我家並無花園何有此婦莊曰在軒後莊即拉陳同至軒後有小土門內僅菜園半畝西角有一猪圈育小猪六口五生一斃莊悚然大悟蓋過橋一跌其魂已出後一跌則魂仍附體倘不戒于淫則墮入畜生道矣

褐道人

國初德侍郎某與褐道人善道人精相術言公某年陞官某年得紅頂某年當遭雷擊德公疑信參半後陞官一如其言乃大懼懇道人避雷擊之法道人故作難色再四求之始言只有一法公于是日約朝中一二品官十餘位環坐前廳大炕上公坐當中過午時則免德公如其言至是日天氣清朗將午起黑雲風雨畢至雷聲轟轟欲下復止忽家人飛報老太太被雷攝至院中德公大驚與各官急趨往扶則霹靂一聲將炕擊碎視其中有一大蝎長二尺許太夫人故無恙也尋褐道人已不見矣始知道人卽蝎精也以術愚人實以自衛智亦巧矣非雷更巧則德公竟不知爲其所用也

佟騎角

京師傳九者出正陽門過一巷路狹人衆挨肩而行一人劈面來急走如飛勢甚猛傅不及避兩胸相撞竟與己身合而爲一頓覺身如水淋寒噤不止急投一緞店坐定忽大言曰你攔我去路可惡已極于是自批其頰自捥其鬚家人迎歸徹夜吵鬧或言有活無常佟騎角

者能治之正將延請而傅九已知之罵曰我不怕銅犄角鐵犄角也未幾終至瞋目視曰汝何處鬼來此害人速供來不實供又汝下油鍋傅瞪目不言但切齒咋咋有聲其時男女觀者如堵佟傾油一鍋燒柴煎之手持一銅叉向傅臉上旋繞作欲刺狀傅果戰懼自供我李四也鳳陽人迫于飢寒盜發人墳被人捉著一時倉猝用鐵鍬拒捕連傷兩人坐法當斬今日擲赴菜市我極力掙脫逃來不料爲此人攔住心實忿忿故與較論佟曰然則速去勿遲乃倚叉而坐傅大哭曰小人在獄中兩腳凍爛不能行走求賜草鞋一雙且求祕密不教官府知道再來捉拏傅家人即燒草鞋與之乃伏地叩頭伸脚作穿狀觀者皆笑佟問何往曰逃禍須遠將奔雲南佟曰雲南萬里豈旦夕可至半路必爲差役所拏不如跟我服役可得一吃飯處也傅叩頭情願佟出囊中黃紙小符焚之傅仆地不動良久蘇醒問之茫然是日刑部秋審訪之果有發墓之犯已梟示矣蓋惡鬼猶不自知其已死也佟年五十餘寡言愛睡往往睡三四日不起至其家者重門以內無寸芥纖埃云其平日所服役者皆鬼也

淘氣

永州守恩公之奴年少狡黠取名淘氣服事書房見檐前流螢一點光大如雞卵心異之時天暑赤臥牀上覺陰處蠕蠕有物動摸視之即螢火也笑曰么麼小蟲亦愛此物耶引被覆身而睡夜半有人伸手被中捫其陰且捥其稜角按其馬眼其時身欲轉折竟不能動似有人來交接者良久精遺矣次日身頗倦憊然冥想其趣欲其再至不以告人日暮浴身裸以俟之二更許螢火先來光愈大照見一女甚美冉冉而至奴大喜抱持之遂與綢繆叩其姓氏曰妾姓姚父某爲明季知府曾居此衙妾年十八以所慕不遂成瘵而死生時酷愛梨花

斷氣時屬老母即塋此園梨樹下愛卿年少故來相就奴方知其爲鬼舉枕投之大呼而出徑叩宅門宅中婦女疑爲火起爭起開門見其赤身俱不敢前主人自出叱而問之奴以實告乃命服以硃砂且爲著禱次日掘梨樹下果得一朱棺剖而視之女色如生乃焚而塋之奴自此恂恂不復狡黠夥伴笑曰人不可不遇鬼淘氣遇鬼不復淘氣矣

白蓮教

京山富人許翁世居桑湖畔娶新婦某妝奩頗厚有偷兒楊三者羨之年餘聞翁送其子入京新婦有孕相伴惟二婢乃夜入其室伏暗處伺之至三更後燈光下見有一人深目虬鬚負黃布囊爬窗而入楊念吾道中無此人屏息窺之其人袖出香一枝燒之于燈置二婢所隨向婦寢處喃喃誦咒婦忽躍起向其人赤身長跪其人開囊出一小刀剖腹取胎放小磁罐中背負而出婦尸仆于牀下楊大驚出戶尾之至村口一旅店抱持之大呼曰主人速來吾捉得一妖賊衆隣齊至視其布囊小兒胎血猶涔涔也衆大怒持鋏鋤擊之其人大笑了無所傷乃沃以糞始不能動及旦送官刑訊曰我白蓮教也夥伴甚多方知漢湘一帶胎婦身死者皆受此害獄成凌遲其人賞偷兒銀五十兩

服桂子長生

呂琪從其兄官嶺南司馬署有古井夏夜納涼見井中有聲琤琤然升起數紅丸大如彈棋疑有寶次早遣人緹下探焉得隔年桂子數十粒鮮赤可愛琪戲以井水服焉日七枚七日而盡頓覺精神強健如服葠者然年九十餘

伊五

披甲人伊五者身矮而貌陋不悅于軍官貧不能自活獨走出城將自縊忽見有老人飄然而來問何故輕身伊以實告老人笑曰子神氣不凡可以學道予有一書授子夠一生衣食矣伊乃隨行數里過一大溪披蘆葦而入路甚曲折進一矮屋止息其中從老人受學七日而術成老人與屋皆不見伊自此小康其同輩羣思咀嚼之伊無難色同登酒樓五六人恣情大飲計費七千二百文衆方愁其難償忽見一黑臉漢登樓拱立曰知伊五爺在此款客主人遣奉酒金解腰纏出錢而去數之七千二百也衆大駭與同步市中見一人乘白馬急馳而過伊縱步追之叱曰汝身上囊可急與我其人惶恐下馬懷中出一皮袋形如半脹豬脬授伊竟走衆不測何物伊曰此中所貯小兒魂也彼乘馬者乃過往遊神偷攫人魂無算倫不遇我又死一小兒矣俄入一衞衞有向西人家門內哭聲嗷嗷伊取小囊向門隙張之出濃烟一縷射此家門中隨聞其家人云兒甦矣轉涕爲笑衆由是神之適某貴公有女爲邪所憑聞伊名厚禮招致女在室已知伊來形色慘沮伊入室女匿屋隅提熨斗自衛伊周視上下出曰此器物之妖也今夕爲公除之漏三下伊囊中出一小劍鋒芒如雪被髮跣足仗之而入衆家人伺于院外尋聞室中叱咤聲擊撲聲與物騰擲聲詬詈喧鬧聲良久寂然但聞女叩頭哀懇不甚了了伊呼燈甚急衆率僕婢秉燭入伊指地上一物相示曰此即爲祟者視之一籐夾膝也聚薪焚之流血滿地

諸廷槐

嘉定諸廷槐家有再醮僕婦李姓者忽鬼扼其喉口稱是汝前夫我病時呼茶索藥汝多不保以至氣忿而亡冥王以我陽數未盡受糟塌死與枉死者一般不肯收留遊魂飄蕩受盡

飢寒汝在此飽食煖衣我心不服故扼汝喉使汝陪我忍飢廷槐知爲鬼所憑上前手批其頰鬼呼痛逃去廷槐視其掌黑如鍋煤少頃鬼又作鬧廷槐再打婦無懼色手亦不黑矣罵曰你家主人初次打我出我不意故被他打痛今我已躲入汝背脊骨竅中雖用掌心雷打我亦不怕也于是衆家人代爲請曰汝妻不過婦道有虧事汝不周並非有心殺汝無大仇可報況汝所生子女賴渠改嫁後夫替你撫養也算有良心汝何不略放手鬆俾其少進飲食鬼唯唯婦覺咽喉一清登時喫飯三碗衆人知其可動乃曰主人替你超度何如鬼又唯唯遂設醮延僧誦往生咒鬼去而復至曰和尚不付度牒我仍不能託生也乃速焚之鬼竟去而婦安矣當作鬧時最畏主人之少子曰此小相公頭有紅光將來必貴我不願見之或問可是諸府祖宗功德修來乎曰非也是他家陰宅風水所蔭問何由知曰我與鬼朋友數人常在墳間乞人祭掃之餘獨不敢上諸府墳因隴上有熱氣一條如火衝出故也

王都司

山東王某作濟甯都司忽一日夢南門外關帝廟周倉來曰汝肯修帝廟可獲五千金王不信次夜又夢關平將軍來曰我家周倉最誠實非誑人者所許五千金現在帝君香案腳下汝須黑夜秉燭來五千金可得王喜且驚心疑香案下地有藏金分應我得者乃率其子持皮口袋往以便裝載及至廟中天已黎明見香案下睡一狐黑而毛兩目金光閃閃王悟曰得毋關神命我驅除此妖耶卽與其子持繩索捆縛之裝放口袋中負之歸家口袋中作人語曰我狐仙也昨日偶醉嘔唾聖帝廟中觸怒神明故託夢于君敎來收拾我我原有罪但念我修煉千年此罪尙小君不如放我出袋彼此有益王戲問何以見謝曰以五千金爲壽

王心記周倉關平兩將軍之言驗矣卽釋放之頃刻變成一白鬚翁唐巾飄帶言詞溫雅藹然可親王乃置酒設席與談過去未來事且問都司窮官如何能得五千金狐曰濟甯富戶甚多俱非行仁義者我擇其尤不肖者竟往彼家拋磚打瓦使他頭疼發熱心驚胆戰自然彼必尋求符籙延請道士君往說我能驅邪但書花押一個向空焚之我卽心照而去又聞別家如此一月則君之五千金得矣但君官爵止于都司財量亦止五千金過此以往不必妄求吾報君後亦從此逝矣未幾濟甯城內外疫厲大作雞犬不甯但王都司一到便即安甯遂得五千金捨二百金修聖廟祭奠周關兩將軍乞病歸里至今小康

杭大宗爲寄靈童子

萬近蓬奉斗甚嚴每秋七月爲孟蘭之會與施柳南刺史同設道場施能見鬼凡來受祭者俱能指爲何人且與言語方立壇時先書列死者姓名向壇焚化萬故杭大宗先生弟子忘書先生名施見是夕諸公俱集有人短白鬚披夾紗袍不冠而至罵曰近蓬我弟子今日設會獨不請我何也施素不識杭不覺目瞪旁一人曰此杭大宗先生也施向前揖問先生何來曰我前生是法華會上點香者名寄靈童子因侍香時見燒香女美偶動一念謫生人間在人間心直口快有善無惡原可仍歸原位惟以我好譏貶人黨同伐異又貪財爲觀音所薄不許即歸原位因自指其手與口曰此二物累我問先生在陰間樂乎曰我在此無甚苦樂頗散蕩游行自如問先生何不仍投人身杭以手作拍勢笑曰我七十七年人身倏忽過去回頭想來有何趣味曰先生何不仍求觀音收留曰我墜落亦因小過容易超度可告知近蓬替我念穢迹金剛呪二萬遍便可歸原位問陳星齋先生何以不來曰我不及彼彼已仍歸桂宮矣語畢上座大啖笑曰施柳南一日不出仕我輩田允兄大有喫處田允兄者俗言鬼字也

西江水怪

徐漢甫在江西見有呪取魚鼈者日至水濱禹步持呪波卽騰沸魚鼈陣至任擇取以歸其法不得多取約日需若干僅給其值而已一日偶至大澤方作法忽水面涌一物大如獼猴

金眼玉爪露牙口外勢欲相攫其人急以襯蒙首走物奔來躍上肩抓其額人即仆地流血暈絕衆咸奔救物見衆至作聲如鴉鳴躍高丈許遁去人不敢捕傷者亦甦其人云此水怪也以魚鼈爲子孫吾食其子孫故來復仇耳其爪銛利遇物破腦非蒙首而得衆力則斃其爪下矣

仲能

唐再適先生觀察川西時有火夫陳某蠢悍嗜飲一夕方醉臥覺有物據其腹視之乃一老翁髯髮皆白貌亦奇古臃腫間不甚了了陳以同伴戲己不甚驚怖時初秋適覆單衾因舉以裹之且挾以臥曉曳衾內有一白鼠長三尺餘已壓斃矣始悟據腹老人即此怪按此即玉策記所云仲能善相卜者能生得之可以預知休咎

雀報恩

周之庠好放生尤愛雀居恆置黍穀于簷下飼之中年喪明飼雀如故忽病氣絕惟心頭溫家人守之四晝夜甦云初出門獨行曠野日色昏暗寂不逢人心懼疾馳數十里見城外寥寥無烟火俄有老人杖策來視之乃亡父也跪而哀泣父曰孰喚汝來答曰迷路至此父曰無傷導之入城至一衙署前又有老人綸巾道服自內出乃亡祖也相見大驚責其父曰爾亦糊塗何導兒至此叱父退手挽之庠行有二隸卒貌醜惡大呼曰旣來此安得便去與其祖相爭奪忽雀億萬自西來啄二隸隸駭走祖父翼之出羣雀隨之爭以翅覆之庠約行數十里祖以杖擊其背曰到家矣遂如夢覺雙目復明至今無恙

全姑

蕩山茶肆全姑生而潔白婀娜年十九其鄰陳生美少年私與通爲匪人所捉陳故富家以百金賄匪縣役知之思分其贓相與率扭到縣縣令某自負理學名將陳決杖四十女哀號涕泣伏陳生臀上願代令以爲無恥愈怒將女亦決杖四十兩隸拉女下私相憐以爲此女通體嬌柔如無骨者又受陳生金故杖輕撲地而已令怒未息翦其髮脫其弓鞋置案上傳觀之以爲合邑戒且貯庫焉將女發官賣案結矣陳思女不已賄他人買之而已仍娶之未一月縣役紛來索賄道路喧嚷令訪聞大怒重擒二人至案女知不免私以敗絮草紙置褲中護其臀令望見曰是下身纍纍者何物耶乃下堂扯去褲中物親自監臨裸而杖之陳生抵攔掌嘴數百後乃再決滿杖歸家月餘死女賣爲某公子妾有劉孝廉者俠士也直入署責令曰我昨到縣聞公呼大杖以爲治強盜積賊故至階下觀之不料一美女剝紫綾褲受杖兩臀隆隆然如一團白雪日炙之猶慮其消而君以滿杖加之一板下便成爛桃子色所犯風流小過何必如是令曰全姑美不加杖人道我好色陳某富不加杖人道我得錢劉曰爲父母官以他人皮肉博自己聲名可乎行當有報矣奮衣出與令絕交未十年令遷守松江坐公館方午餐其僕見一少年從窗外入以手拍其背者三遂呼背痛不食已而背腫尺許中有界溝如兩臀然召醫視之醫曰不救而成爛桃子色矣令聞心惡之未十日卒

奇勇

國初有二巴圖魯一溺地地陷一尺能自抓其髮拔起身在空中高尺許兩足離地移時不下一在關外被敵刦營黑暗中已爲敵斷其首矣刀過處急以右手捺住頭左手揮刀猶殺數十人而後死

紅毛國人吐妓

紅毛國多妓嫖客置酒召妓剝其下衣環聚而吐口沫于其陰不與交媾也吐畢放賞號衆兜錢

西賈認父

錢塘銓部主事吳名一騏者初舉孝廉入都會試僦居旅次有西賈王某來云其父臨終言往生浙地某處爲吳氏子其終年即銓部生年也又云昨晚其母又復示夢云汝父已至都中現寓某處汝何不往以故到此訪問乞一觀顏色銓部因事屬怪異不肯出見王賈痛哭遙拜而去王賈甚富並無所希冀而來者以故人笑吳公之迂吳作吏部主事數年死死年二十八

徐步蟾宮

揚州吳竹屏臬使丁卯秋闈在金陵扶乩問中否乩批徐步蟾宮四字吳大喜以爲館選之徵及榜發不中是年解元乃徐步蟾也

歪嘴先生

湖州潘淑聘妻未娶以瘵疾亡臨終請岳翁李某來要其未嫁之女守志翁許之潘卒後翁忘前言女竟改適將婚之夕鬼附女身作崇有教讀張先生者聞之意不能平竟上女樓引古禮折之以爲女雖已嫁而未廟見尙歸葬于女氏之黨況未嫁之女有何守志之說鬼不能答但走至張前張口呵之一條冷氣如冰臭不可耐從此女病愈而張嘴歪矣李德之延請在家合村呼歪嘴先生

鬼衣有補褂痕

常州蔣某在甘肅作縣丞乾隆四十五年甘肅回回作亂蔣爲所害三年音耗斷矣其姪某開參店于東城忽一日午後蔣竟直入布裹其頭所穿衣有釘補褂舊痕告其姪曰我于某月日爲亂兵所害屍在居延城下汝可遣人至其處棺殮載歸指其僕曰此小兒亦是劫數中人我現在陰間僱用之每年給工資銀三兩其姪大驚唯唯聽命鬼命小僮取火喫烟旋即不見姪即遣人載其棺歸啓視之頭骨斫作數塊身著紅青緞褂隱隱有補褂一方痕迹

孫方伯

孫涵中方伯爲部郎時居京師之櫻桃斜街房宇甚潔忽有臭氣一道從窗外達于中庭嗅而迹之乃從後苑井中出夜三鼓衆人睡盡有連呼其老僕姓名者聽之隱隱然亦出自井中孫公怒而填之怪亦竟絕

賣冬瓜人

杭州草橋門外有賣冬瓜人某能在頭頂上出元神每閉目坐牀上而出神在外酬應一日出神買鰲數片託鄰人帶歸交其妻妻接之笑曰汝又作狡獪耶將鰲撻其頭少頃賣瓜者神歸以頂爲鰲所污傍徨牀側神不能入大哭去尸亦漸僵

柳如是爲厲

蘇州昭文縣署爲前明錢尙書故宅東廂三間因柳如是縊死此處歷任封閉不開乾隆庚子直隸王公某蒞任家口多內屋少開此房居妾某氏二婢作伴又居一妾于西廂老嫗作伴未三鼓聞西廂老嫗喊救命聲王公奔往妾已不在牀上尋至牀後其人眼傷額碎赤身

流血穀觶而立云我臥不吹燈方就枕便一陣陰風吹開帳幔徧體作噤有梳高髻披大紅襖者揭帳招我隨挽我髮強我起我大懼急逃至帳後眼目爲衣架觸傷老嫗聞我喊聲隨即奔至鬼纔放我走窗外去合署大駭慮東廂之妾新娶膽小亦不往告次日至午東廂竟不開門啓入則一姬二婢俱用一條長帶相連縊死矣于是王公仍命封鎖此房後無他異或謂柳氏爲尙書殉節死于正命不應爲厲按金史蒲察琦傳琦爲御史將死崔立之難到家別母母方晝寢忽驚而醒琦問阿母何爲母曰適夢三人潛伏梁間故驚醒琦跪曰梁上人乃鬼也兒欲殉節意在懸梁故彼鬼在上相候母所見者即是也旋即縊死可見忠義之鬼用引路替代亦所不免

捧頭司馬

如臯高公巖爲陝西高陵令其友某往探之去城十里許日已薄暮恐不能達見道旁廢寺正室封扃西偏屋二楹內有小門通正室門亦封扃某以屋尙整潔遂借宿焉沽酒少飲解衣就寢其僕出與守寺道人同宿東邊之耳房時當既望月明如晝某久不成寐忽聞正室履聲橐橐小門嗒然頓開見有補褂朝珠而無頭者就窗下坐作玩月狀某方驚其人轉身向內若有見於某者旋即走還正室中某急起開門遁而門外鎖已爲其僕倒扣去某大呼瘖不能聲其僕弗應某無措遂奪窗出窗外有牆繚之又不可克越近窗高樹一株乃緣之而上俯視窗下則其人已捧頭而出仍就前坐以頭置膝徐伸兩指拭其眉目還以手捧之安置頂上雙眸炯炯寒光射人是時某已魂飛不復省人事矣次晨僕入不見主人遍尋之得於樹上急攢其腕交抱樹柯堅不可解久之始甦猶謂鬼之來攫己也問之道人云二十年

前甯夏用兵有楚人爲同知者解糧誤期爲大帥所戮極行至此資斧告絕遂寄寺中今或思歸見形於客乎某白高高因捐俸爲賈極資並寓書於楚令其子領歸

驅蠶

吳興卞山有白蠶洞每春夏間卽見狀如匹練起空中游漾無定所過之下蠶繭一空故養蠶時尤忌之性獨畏鑼鼓聲明太常卿韓紹曾命有司挾毒矢逐之有驅蠶文載郡志近年來作患尤甚乾隆癸卯四月有范姓者具控於城隍是夜夢有老人來曰汝所控已准某夜當命元衣真人逐蠶但蠶魚司露有功德受害者亦有數彼以貪故當示之罰爾等備硫磺烟草在某山洞口相候可也范至期集數十人往夜二鼓月色微明空中風作見前山有大蝙蝠丈許飛至洞前瞬息諸小蝙蝠集者不下數十每一蝙蝠至必有燈一點如引導狀范悟曰是得非所謂元衣真人乎卽引火縱燒烟草俄而洞中聲起如潮湧風發有匹練飛出蝙蝠圍環若布陣然彼此搏擊良久鄉民亦羣打鑼鼓放爆竹助之約一時許匹練飄散如絮有青氣一道向東北而去蝙蝠亦散次早往視林莽間綿絮千餘片或青或白觸手腥穢不可近自是蠶患竟息

海中毛人張口生風

雍正間有海船飄至臺灣之彰化界船止二十餘人貨貨頗多因家焉踰年有同夥之子廣東人投詞於官據云某等泛海開船後遇颶風迷失海道順流而東行數晝夜舟得泊岸回視水如山立舟不可行因遂登岸地上破船壞板白骨不可勝計自分必死矣不逾年舟中人漸次病死某等亦糧盡餘荳數斛植之竟得生荳賴以充腹一日者有毛人長數丈自東

方徐步來指海水而笑某等向彼號呼叩首長人以手指海若揮之速去者某等始不解既而有悟急駕帆試之長人張口吹氣蓬蓬然東風大作晝夜不息因望見鹿仔港口遂收泊焉彰化縣官案驗得實移咨廣省以所有資物按二百餘家均分之遂定案焉後有土人云此名海圍乃東海之極下處船無回理惟一百二十年方有東風屈曲可上此二十餘人恰好值之亦奇矣第不知毛而長者又爲何神也

卞山地陷

乾隆乙巳湖州大旱西門外下塘地陷數丈民居屋脊與地相平屋中人破瓦而出什物一無損壞河中忽互起土埂升出白光一道望龍溪而去怪風隨之溪中漁舟數十俱爲白光所迷俄頃風定舟俱聚一處而白光亦不見矣時有方老人者年九十餘自云少年時見漁舟捕得白鱸一條重五六斤不敢匿獻之烏程令某適令前一夕夢見一白衣女子來告云某莒上水神也爲陳皇后守宮門明日有厄求救次日見鱸而悟仍命放入河中今土中白光得毋卽此物歟考西門外與迎禧門相連南朝陳武帝之后爲其父母營葬於卞山起民夫開地道而出葬後仍行封閉然則地之陷亦有由矣

鬼逐鬼

桐城左秀才某與其妻張氏伉儷甚篤張病卒左不忍相離終日伴棺而寢七月十五日其家作盂蘭之會家人俱在外禮佛設醮秀才獨伴妻棺看書忽陰風一陣有縊死鬼披髮流血拖繩而至直犯秀才秀才惶急拍棺呼曰妹妹救我其妻竟勃然掀棺而起罵曰惡鬼敢無禮犯我耶君耶揮臂打鬼鬼踉蹌逃出妻謂秀才汝癡矣夫婦鍾情一至于此耶緣汝福

薄故惡鬼敢于相犯盍同我歸去投人身再作偕老計耶秀才唯唯妻仍入棺臥矣秀才呼家人視之棺釘數重皆斷妻之裙夾半幅于棺縫中也不踰年秀才亦卒。

柳樹精

杭州周起昆作龍泉縣學教諭每夜明倫堂上鼓無故自鳴遣人伺之見一人長丈餘以手擊鼓門斗兪龍素有胆暗張弓射之長人狂奔而去次夜寂然後兩月學門外起大風拔巨柳一株周命鋸之爲薪中有箭橫貫樹腹方知擊鼓者此怪也龍泉素無科目是年中一陳姓者

摺疊仙

濟市關有陳一元者棄家學道購一精舍獨坐其間內加鎖鑰初辟粥飯繼辟果蔬但飲石湖之水命其子每一月餉水一壺次月往視則壺仍置門外而水已乾乃再實其壺以進焉孫敬齋秀才聞而慕之書一紙條貼壺蓋上問可見否并請許見日期心惴惴恐不許也次月往探壺上批紙尾云二月初七日可來相見孫大喜臨期與其子偕往見一元年僅四十許而其子則已老矣孫問修道從何下手曰汝且靜坐片時自數其心所思想處孫坐良久一元問汝可起幾許念頭曰起過七十二念一元笑曰心無所寄求靜反動理之常也汝一個時辰起七十二念不可謂多根氣可以學道遂教以飲水之法曰人生本自虛空而來因食物過多致身體堅重腹中穢蟲叢起易生痰滯學道者先清其口再清其腸餓死諸蟲以蕩滌之水爲先天第一真氣天地開闢時未有五行先有水故飲水爲修仙要訣但城市水渾有累靈府必取山中至清之水徐徐而吞使喉中喀喀有響然後甘味纔出一勺水可度

子不請卷十六
一晝夜如是一百二十年身漸輕清并水可辟便服氣御風而行矣孫問一元何師曰余三十年前往太山燒香遇一少年貌甚靈俊能預知陰晴因與一路偕行少年背負一錦匣每至下店必向匣絮語片時然后安寢心大驚疑鑿壁窺之見少年放匣几上整冠再拜一老人從匣中笑坐而起雙眸炯炯白鬚飄然兩人相與密語聽不可解但聞有竊道者有道竊者八字而已夜三更少年請曰先生可安寢乎老人頷之遂將老人摺疊如紙絹人一般裝入匣中矣次日少年知余窺見故告我來歷許我爲弟子而傳以道也孫抱一元試之連所坐椅僅三十斤孫以兩女未嫁故乞假而歸假滿再往余見之于震澤張明府署中具道如此時戊申二月初十日也

仙人頂門無髮

癸巳秋張明府在毗陵遇楊道人者童顏鶴髮惟頂門方寸一毛不生怪而問之笑曰汝不見街道上兩邊生草而當中人所踐踏之地不生草乎初不解所謂旣而思之知腓門地方故是元神出入處故不生髮也道人夜坐僧寺門外僧招之內宿決意不可次早視之見太陽東升道人坐牆上吸日光其頂門上有一小兒圓滿清秀亦向日光舞蹈而吞吐之

香虹

吳江姜某一子一女其子娶新婦劉氏劉性柔婉不能操作有婢香虹者素詭譎因與其女日夜媒藥其短劉恨不能伸來時嫁貲頗豐爲其姑逼索且盡未期年染病牀褥姑謂其癆也不許其子與見劉抑鬱死忽一日其女登牀自批其頰歷數其生平之惡且云姑使我不與郎見亦是姻緣數盡然爾輩用心何太酷耶如是數日爲設醮亦不應姜與其妻婉求之

乃曰翁待吾厚姑亦老悖此時香虹之過我不饒他香虹在惻忽瞪自大呼兩手架空而行若有人提之者墜下則已斃矣其女依然無恙此乾隆五十三年正月事

閻王升殿先吞鐵丸

杭州閔玉蒼先生一生清正任刑部郎中時每夜署理陰間閻王之職至二更時有儀從轎馬相迎其殿有五先生所蒞第五殿也每升殿判官先進鐵彈一丸狀如雀卵重兩許教吞入腹中然后理事曰此上帝所鑄慮閻羅王陽官署事有所瞻徇故命吞鐵丸以鎮其心此數千年老例也先生照例吞丸審案畢便吐出之三滌三視交與判官收管所辦事晨起輒忘即記得者亦不肯向人說但勸人勿食牛肉多誦大悲呪而已到任三月忽一日晨起召諸親友而告曰吾今而知小善之不足爲也昨晚吾表弟李某死生魂解到判官將其生平作官惡迹請寄地獄審定擬罪再詳解東嶽余心惻然將獄牌安放几上再三目李李自訴平生不食牛肉作官時禁私宰尤嚴似可以此功德抵銷他罪余未作聲判官駁云此之謂恩足以及禽獸而功不至于百姓也子不食牛肉何以獨食人肉李云某並未食人肉判官曰民脂民膏即人肉也汝作貪官食千萬人之膏血而不食一牛之肉細想小善可抵得大罪否李不能答余知李素誦大悲呪爲陰司所最重因手書大悲咒三字在掌上以示之李竟茫然不能誦一字余爲代誦數句滿堂判官胥役一齊跪聽西方赫然似有紅雲飛至者然而鐵丸已湧起于胷中左衝右撞腸痛欲裂矣余不得已急取獄牌加硃放李獄中腸內鐵丸始定方理別案而歸諸親友因問到底牛肉可食乎先生曰在可食不可食之間人問故曰此事與敬惜字紙相同聖所未戒然不過推重農重文之心充類至義之盡故禁食之

者慈也然天地不仁以萬物爲芻狗此語久被老子說破試想春蠶作絲衣被天子以至于庶人其功比牛更大其性命比牛更多而何以烹之煮之抽其腹腸而炙食之竟無一人爲之鳴冤立禁者何耶蓋天地之性人爲貴貴人賤畜理所當然故食牛肉者達也

萬佛崖

康熙五十年肅州合黎山頂忽有人呼曰開不開不開如是數日無人敢答一日有牧童過聞之戲應聲曰開頃刻蒼然風雷怒號山石大開中現一崖有天生菩薩像數千鬚眉宛然至今人呼爲萬佛崖章淮樹觀察過其地親見之

大力河

孫某作打箭爐千總其所轄地陰雨兩月忽一日雨止仰天見日光孫喜出舍視之頃刻烟沙蔽天風聲怒號孫立不牢撲地亂滾似有人提其辮髮而顛擲之者腿臉俱傷孫心知是地動忍而待之食頃動止起視人民與自家房屋全已傾圮有一弟出逃未死彼此惶急孫老于居邊者謂弟曰地動必有回潮不止一次我與汝須死在一處乃各以繩縛其身兩相擁抱言未畢而怪風又起兩人臥地顛播如初幸沙不昧眼見地裂數丈有冒出黑風者有冒出火光如帶紫綠二色者有湧黑水臭而腥者有現出人頭大如車輪目睽睽斜視四方者有裂而仍合者有永遠成坑者兄弟二人竟得無恙乃埋壘全家掘出貨物各自謀生先三月前有瘋僧持緣簿一冊上寫募化人口一萬孫惡其妖言將擒之送縣僧已立一楊柳小枝上曰你勿送我我到縣送我塞大力河水口可也言畢不見是年地動日四川大力河水沖決溺死萬餘人